

Xojon-la San Juan kjoa xi tsako-la Jesucristo

Kjoa xi kijtsee ko 'en xi kiinchré San Juan

¹ Jñà kjoa koi xi kitjoé-la Jesucristo nga Nainá kitsjaà-la mé-ne nga kokò-la xita chi'nda-la jñà kjoa xi ta nitoón okoma. Jesucristo kisikasén àkjale-la nga tsakó-la kjoa koi Juan xi chi'nda-la ma. ² Ko jè Juan tíchja kixi-né [k'e nga kiskiì] ngats'ìi kjoa xi kijtsee ko xi kiinchré koni s'ín nga jè Jesucristo kiichja kixi-la jñà 'en xi kitsjaà-la Nainá.

³ Mé tà ndaà-la jè xita xi bíxkejìn xojon koa jñà xi 'nchré 'en-la Nainá xi tít'aà xojon jè, jñá kjoa xi sa kítasòn; tíkoáá mé ta ndaà-la jè xita xi síkitasòn koni tsò xojon jè, nga jè nàchrjein, jyeé nchrobá machraña.

Kó tsò Juan nga síhixat'aà nga itoò naxandá-la Cristo xi títsajna ján i'nde Asia

⁴ 'An xi 'mì-na Juan, tisìhixat'aà-nò, jñò xi naxandá-la Cristo maà xi itoò i'nde títsajnaà ján nangui Asia. Jè kàtatsjá-nò kjondaà ko kjoa'nchán jè Nainá xi tíjna, jè xi tsibìjna ko jè xi kjoíi ìjngò k'a-ne; k'oa tìs'ín kàtatsjá-nò kjondaà ko kjoa'nchán jñà inìma xi itoò ma-ne xi títsajna nguixkon jè xi tíjnasòn íxile nga tíhotíxoma; ⁵ ko jè Jesucristo k'oa tìs'ín kàtatsjá-nò kjondaà ko kjoa'nchán. Jè Cristo, jè xi nguì 'en kixi tsjá, xi kí'ndí tjòn xi jaáya-la it'aà ts'e kjoa biyaa ko jè xi otíxoma-la jñà xita sko-la xi tjin i it'aà nangui.

Cristo matsjakeè-ná nga kisìtsjeè jé-ná it'aà ts'e jní-là xi tsibíxteèn. ⁶ Cristo k'oaá s'ín kisìkítsajna-ná nga xítà ítjòn komaá kò nò'miì komaá nga jñá s'ixá-lá Nainá xi Nà'èn-là ma Jesucristo. Jeya kàtìjna; jè kàtatíxoma kjit'aà, nítà mé nàchrjein-ne, nítà mé nó-ne. K'oaá s'ín kàtama.

⁷ ¡Chítsejèn-là! Jè Cristo jyeé kjomeé f'ìi nga tínychrobájìin ifi. Ngats'ìi xítà, xkoón skoe-ne. Jñà xítà xi kisìk'én Cristo tìkooá skoe-ne. Ngats'ìi xítà naxandá xi t'jín i it'aà nangui skíndáyakeè-né nga 'on koma-là it'aà ts'e. Jon, k'oaá s'ín koma.

⁸ “An-ná xi tìjna ítjoàn skanda tàts'en-là kjoa kò nga skanda fehet'aà-ne; 'an-ná xi tìjnaa, xi tsibi-jnaa, kò xi kjoii ijngoò k'a; tajngoó-ná xi tse nga'ño t'jín-na”, tsò Nà'èn-ná xi Nainá.

Kjoa xi tsakó-là Nainá Juan it'aà ts'e Cristo

⁹ 'An-ná xi mì-nà Juan, xi 'ndsè xan-nò it'aà ts'e Cristo. Nga yaá titsajna kooá Cristo ngàsòn titsanìkjiaán kjo'in, kò ngàsòn ya nokjoà-ná ñánda tíhotíxoma Nainá kò ngàsòn tíchíkjoakò-ná ngats'ìi kjoa. 'An nga 'én-là Nainá tíchjàya kò tibenojmí kixi-là xítà it'aà ts'e Cristo, k'oaá komà-ne ján kinìkasén-na ya nangui jìin-ndá ñánda 'mì Patmos.

¹⁰ Jngoò nàchrjein-là Nainá, 'an, nga ya tìjna kooa Inìma Tsjeè-là, ya ítjòn índsiàn k'ì'nchrè jngoò-là 'én xi 'ño kùichja koni jngoò chrjo xi 'ño jane,

¹¹ kitsò-na:

—'An-ná xi tìjna ítjoàn kò xi fehet'aà-ne. Chjoí jngoò xojòn, tít'eii kjoa xi tì'yi; ikjoàn tìkasén-là naxandá-na xi itoò j'nde títsajna ján nangui Asia, jñà naxandá xi 'mì Éfeso, Esmirna, Pérgamo, Tiatira, Sardis, Filadelfia kò Laodicea.

¹² K'eé kisikátjifaya nga mejèn-na skoeè yá xita xi tíchja-na; kijtseè itoò candelero xi nguì kichà oro xi ma tya asitì. ¹³ Ya jngoò osen-la ñánda jncha candelero xi itoò ma-ne sijnajin xi okji koni kji ki'ndí-la xita. Jngoò nikje kinakjá xi ndojò kji. Bijchó skanda itjòn ndsokò. Tíkjá jngoò na'ño payo ya isòn inima-la xi nguì oro. ¹⁴ Tsja sko, k'oaá kjoàn koni kjoàn tsja chroba-la orrè, koni kjoàn 'nchán kjoàn. Xkon, k'oaá s'in tsejèn koni tsà títi ni'in. ¹⁵ Ndsokò k'oaá kjoàn koni kichà sinè xi 'ño ndaà ote k'e nga jye sijnin ni'in. Jè jta-la, k'oaá s'in na'yà-la koni ñánda 'ño je nandá tìbixòjen-tjòn. ¹⁶ Jè tsja kixi, itoò ni'ño tjíya. Jè tso'ba jngoò kichà ndojò bitjo xi 'ño yijò kji ingajò ngobà. Isén-la k'oaá kji koni kji ts'oi k'e nga 'ño matsjè ndobá, 'ño ote kji.

¹⁷ K'e nga kijtseè, kiskaànguia ingui ndsokò koni jngoò mik'en. Ikjoàn jè tsakájnason-na tsja kixi, kitsò-na:

—Kì tsakjoòn-jèn, 'an-ná xi tijná itjoàn kò xi fehet'aà-ne, ¹⁸ kò tijnakon-ná. Tsakátijna k'en-ná tanga i'ndeij tijnakon-ná nita mé nachrjein, nita mé nó-ne. 'An tjíya ndsaa ibi ts'e kjoabiyaà ya i'nde-la mik'en. [Tjì'ndeé-na nga skix'aa kò kichjoà nga sijkjaáya-la.] ¹⁹ Chjí jña kjoa xi jye kà'yi kò kjoa xi tíma nachrjein i'ndeij kò kjoa xi koma nga koma iskan. ²⁰ Kíí tsò-ne jè kjoa'ma xi kà'yi ts'e ni'ño xi itoò ma-ne xi tjíya ndsaa kixi kò xi itoò candelero xi nguì kichà oro. Jña ni'ño xi itoò ma, jña àkjale-la naxandá-na xi itoò i'nde títajna; kò jña candelero xi itoò ma-ne, jña-né xi naxandá-na xi itoò i'nde títajna.

2

Kjoa xi kisinè-la naxandá-la Cristo ján Éfeso

¹ 'Chjí jngoò-la xojon jè àkjale-la naxandá-na xi tíjna ján Éfeso: “Kíí tsò jè xi itoò ni'ño tíjya tsja kixi, jè xi tsóhojiìn osen-la jña candelero xi itoò ma-ne xi nguì kichá oro, tsò-né: ² Tìbe-ná xá-nò, 'ño títsanìxá kò nga mìkìi bijta-nò. Tìkoaá tìbe-ná nga mì tì kii chíkjoako-nò jña xita xi ch'o s'ín. Tìkoaá tìbe-ná nga jyeé kichìt'aà jña xita xi tsò-la yijo-la nga Cristo tsibíxáya-la, tanga mìtsà kixi kjoa. Jyeé ki'yaà nga xita ndiso-né. ³ Kjit'aà nachrjein 'ño tse kjo'in títsanìkjoón, kò 'ño títsanìxá xi kjoa ts'an. Mìkìi bijta-nò. ⁴ Tanga tjín jngoò-nò kjoa xi ch'o tjín xi mìkìi sasén-na nga mì tì k'oaá s'ín tjín-nò kjo'tjòcha koni nga sa ítjòn. ⁵ Jñò, tìkítsjeèn kó ki'nè nga sa ítjòn k'e nga kj'eè jé bixòjñoò. Tìkájno jé-nò. Ìjngoò k'a Nainá tanguít'aà-là. K'oaá s'ín t'een koni ki'nè nga sa ítjòn. Tsà majìn-nò, 'an kjián nga tsjaà-nò kjo'in kò kjoáxìn-nò ni'ín candelero-nò ya ì'nde ñánda síjna. ⁶ Tanga tjín kjoa xi ndaà títsa'nè nga majticha kjoa xi s'ín jña xita nicolaítas. 'An, tìkoaá majtike-ná. ⁷ Ndaà tìná'yaà koni tsò Inimá Tsjeè-la Nainá nga tíchja-la naxandá-na. Jña xi sìkijne, 'aán tsjaà-la nga skine jña toò-la jè yá xi síkijnakon-ná xi síjna ya ì'nde-la Nainá ñánda 'ño ndaà choòn.”

Kjoa xi kisinè-la naxandá-la Cristo ján Esmirna

⁸ 'Chjí jngoò-la xojon jè àkjale-la naxandá-na xi tíjna ján Esmirna: “Kíí tsò jè xi tsibìjna ítjòn kò xi fehet'aà-ne, jè xi k'en kò jaáya-la, tsò-né: ⁹ 'An be-ná xá-nò kò kjo'in xi títsanìkjoón kò nga xita

ima 'mì-nò (tanga it'aà ts'e Nainá, xita nchiná-nó jñò). Be-ná nga ch'oo chjajno-nò jñà xita xi tsò nga xita judío-né tanga mitsà kixi kjoa nga xita judío. Jñà xita koi, yaá chja-ne ya ni'ya ñánda maxkóya xita-la xita neí. ¹⁰ Kì tsakjoòn-jèn jè kjo'in xi sikjioón, jè xita neí skinis'en-nò ndayá mé-ne nga skót'aà-nò kjoa xi mokjeín-nò; te nachrjein s'e-nò kjo'in. 'Nó t'è-là takòn kóni skanda k'e nga kiyá. Kò 'aán tsjaà-nò jè kjoabinachon xi mìkii fehet'aà koni jngoò corona. ¹¹ Ndaà tiná'yaà koni tsò Inima Tsjeè-la Nainá nga tíchja-la naxandá-na. Jñà xi sùikijne, nimé kjoa xi komat'in it'aà ts'e kjoabiyaà xi ma-ne jò k'a.”

Kjoa xi kisinè-la naxandá-la Cristo ján Pérgamo

¹² Chjí jngoò-la xojon jè àkjale-la naxandá-na xi tíjna ján Pérgamo: “Kíí tsò jè xi tjin-la kichá ndojò xi yijò kji nga ingajò ngobà, tsò-né: ¹³ 'An tibe-ná xá-nò, tibe-ná nga yaá titsajnaà ñánda tíhotíxoma xita neí. Tanga be-ná nga kixi titsajnaà; mìkii nìjchàajioòn it'aà ts'an. Tikoá be-ná nga mìkii bì'ma koni s'in mokjeín-nò it'aà ts'an, nas'in k'e nga k'en Antipas, xita xi kixi bénojmi xi it'aà ts'an; nga yaá k'en jjiìn naxandá-nò ya ñánda síxá xita neí. ¹⁴ Tanga tjin i'nga kjoa xi mìkii sasén-na nga ch'o titsa'nè, nga yaá titsajnajiìn-nò xita xi mokjeín-la koni s'in tsakóya Balaam kjòtseé nga chinchá'a Balac nga mejèn-la kohótsji jé jñà xita Israél nga kàtakine tsojmi xi xkósòn kisinchaàt'aà-la; tikoá kàtas'in kjoachijngui. ¹⁵ Tikoáá titsajnajiìn i'nga-nò xita xi mokjeín-la koni s'in okóya jñá xita nicolaítas. Jñà xita koi, 'an majtike-ná. ¹⁶ K'oaá ma-ne tikájno jé-nò, kì tì jé binchaàtsji-nò. Tsà mì

k'oa s'een, nitoón kjián nga skaàn-koaa xita koi. Jè sikjeén kichà ndojò xi bitjo-ne ndsoba. ¹⁷ Ndaà tiná'yaà koni tsò Inima Tsjeè-la Nainá nga tíchja-la naxandá-na. Jñà xi sikkijne, 'aán tsjaà-la tsojmì xi skine xi 'mì maná xi 'an tjí'ma-na; tikoá tsjaà jngoò-la ndí ndajo jtobá xi chroba kji; yaá tjí't'aa 'ín xitse xi mì yá beèxkon; tà jè skoexkon xi tjoé-la.”

Kjoa xi kisinè-la naxandá-la Cristo ján Tiatira

¹⁸ 'Chjí jngoò-la xojon jè àkjale-la naxandá-na xi tíjna ján Tiatira: “Kíí tsò jè Kí'ndí-la Nainá xi kokjoàn xkon koni ni'ín, kò jñà ndsoko, k'oaá kjoàn koni kichà sinè xi 'mì bronze xi 'ñó ndaà kjòchrja'i: ¹⁹ 'An, be-ná xá-nò kò kjoatjòcha-nò, kò kós'ín nga mokjeiín-nò koá kós'ín titsanixá nga tíchíkjoako-nò xá xi titsa'nè. Be-ná nga jè naxrjein i'ndeí isaá ndaà titsanixá mì k'oa-ne koni nga sa ítjòn. ²⁰ Tanga tjín i'nga kjoa xi mìkil sasén-na nga ch'o titsa'nè, nga bìi'nde-là jè chjoón Jezabel xi tsò-la yijo-la nga ma-la bénojmiya mé kjoa xi iskan koma nga konachan kò okóya-la xita chí'nda-na mé-ne nga kjoachijngui kátas'ín-ne tikoá kàtakine tsojmì xi xkósòn sinchát'aà-la. ²¹ 'Aán titsja isa-la naxrjein nga kátasíkájno jé-la nga mì tí jé kohótsji-ne, tanga majín-la tsjeiín takòn kjoachijngui xi s'ín. ²² Tanga 'aán tsja-la ch'in nga 'ñó tse kjo'in sikkjeiín kò jñà xita xi ngásòn s'ín kjoachijngui, tsà majín-la nga sikkájno jé-la nga mì tí jé kohótsji-ne. ²³ Jñà xita xi ya fit'aà-la, jngoò k'aa sikk'en. Kò ngats'iì xita naxandá-la Cristo skoe-né nga 'an-ná xi be kó tsò kjohítsjeèn-la kò inima-la jñà xita. Jñò, nga jngoò ijngoò, k'oaá s'ín tsja-nò kjo'in koni tjín kjoa xi titsa'nè. ²⁴ Tanga

jñò kò xità xi l'nga xi títsajna Tiatira xi mìkìl kota'yà kjòhítsjeèn xi mìkìl ndaà tjín, tìkoà kj'eè kii beè jè xi tsò-la jñà xità koi kjoatjí'ma-la xità nejí. Jñò, k'oaá xan-nò mìtsà tì mé kjoa sijné-isa-nò. ²⁵ Tanga jñò, koni s'ín tjín jè kjòhítsjeèn ndaà xi títsa'nè, k'oaá s'ín t'een skanda k'e nga 'an kjoiaa ìjngoò k'a. ²⁶ Jñà xi sikkijne-la kjoa ts'e jé tìkoà sikkitasòn xá-na koni s'ín mejèn-na skanda k'e nga kjoehet'aà nachrjein, 'aán tsjaà-la xá nga jñà kotìxoma-la ngats'ìi naxandá xi tjín isò'nde. ²⁷ Jñà xità xi kotìxoma, nguì koó kichà kotìxoma-ne. K'oaá s'ín sikkxoaya koni tìjí ni'nde. ²⁸ Jè kjotìxoma jè, tìjé-ne xi kitsjaà-na Na'èn-na. 'An tìkoá tsjaà-la jè ni'ño tse xi bitjokàtji k'e nga tajñòya. ²⁹ Ndaà tiná'yaà koni tsò Inìma Tsjeè-la Nainá nga tíchja-la naxandá-na.”

3

Kjoa xi kisinè-la naxandá-la Cristo ján Sardis

¹ 'Chjí jngoò-la xojon jè àkjale-la naxandá-na xi tjína ján Sardis: “Kíí tsò jè xi itoò inìma-la Nainá tjín-la, kò itoò ma ni'ño-la: 'An be-ná kjoa xi títsa'nè; k'oaá s'ín 'ya-nò nga títsajnakon-nó tanga xi nguì kixi kjoa, títsajnak'en-nó. ² Tìkjaáya-là yijo-nò, tjii-là nga'ño kjoa xi jye mejèn tíchija. 'An, kj'eè kii be tsà ndaà títsa'nè nga nguixkon Nainá. ³ Tìkítsjeèn kjòhítsjeèn xi kitjoé-nò kò xi jye ndaà kina'yà; k'oas'ín tìkitasòn. Tìkájno jé-nò, kì tì jé binchaàtsji-nò. Tsà mìkìl sikkindaá yijo-nò k'oaá s'ín kjoikjaá-nò koni s'ín xità chijé k'e nga mìkìl títsajnandaà mé hora-ne nga kjoí. ⁴ Tanga tjín chiba-nò xità ya Sardis xi kj'eè mé jé ótsji, yaá taña

kinchimako-na nga chroba kjoàn nikje xi kókjá nga k'oaá s'ín ok'ín-la. ⁵ Jñà xità xi sikkijne-la kjoa ts'e jé, nikje chrobaá kjoàn xi kókjá; mìkiì sìchàaya 'ín-la ya it'aà xojon ts'e kjoabinachon. Ko k'oaá xán nga nguixkon Nainá xi Na'èn-na ma ko nguixkon àkjale-la nga xità ts'an-ná. ⁶ Ndaà tiná'yaà koni tsò Inima Tsjeè-la Nainá nga tíchja-la naxandá-na.”

Kjoa xi kisinè-la naxandá-la Cristo ján Filadelfia

⁷ Chjí jngoò-la xojon jè àkjale-la naxandá-na xi tíjna ján Filadelfia: “K'oaá tsò jè xi nguì xità tsjeè ko xi nguì jè sobà xi xità kixi, jè xi tjín-la ibi-la xitaxá ítòn xi ki'mì David, jè xi ma-la kix'a xòhotjoa-la ngajmù ko nijngoò-isa xi tjí'nde-la nga kichjoàjto; ko k'e nga jè kichjoàjto, nijngoò-isa xi tjí'nde-la nga skíx'ajto: ⁸ 'An be yije-ná xá-nò; chítsejèn-là, kisíkijna osen jngoò-nò xotjoa xi tix'á, xi nijngoò tjí'nde-la nga kichjoàjto. Nga nas'ín tà chiba nga'ño tjín-nò tanga titsanìkitasòn-nó koni tsò 'én-na; mìkiì bitsajna'ma it'aà ts'an. ⁹ Tjín jngoò jtín xità xi ya chja-ne ya ni'ya ñánda maxkóya xità-la xità nejí; xità ndiso-né nga tsò nga xità judío, tanga mìtsà kixi kjoa. Xità koi, 'aán kichjà-la nga kàtjanchrobá mé-ne nga kinchaxkó'nchit'aà-nò; k'oaá s'ín skoe-ne nga 'an, 'ño matsjake-nò. ¹⁰ Koi kjoa-la nga titsanìkitasòn koni tsò 'én xi kitsjaà-nò nga kichikjoako kjit'aà-nò nita mé kjoa-ne, k'oaá ma-ne, 'aán kósiko-nò jè nachrjein xi jye nchrobá machraña nga s'e-la kjo'in nga tíjtsa isò'nde k'e nga chít'aà yije xità xi i títsajna it'aà nangui. ¹¹ Kjoji nitoón ijngoò k'a. Ndaà tikinda ngats'ii kjondaà xi tjín-nò koni s'ín mokjeiin-nò mé-ne nga mì yá xi kjoaá'an-nò xi jño jye

kinikijne. ¹² Jñà xi s̄ikijne-la ngats'iì kjoa ch'o xi t̄jín isò'nde, 'aán tsja jngoò-la i'nde ñánda kítsajna nga kjit'aà n̄achrjein k'oaá ngaya-la koni jngoò chrjó xi kos̄ingui'ñó-la ya ni'ya tsjeè-la Nainá nga sk̄ijnoa 'ín-la xi Nainá xan-la ko 'ín-la naxandá-la Nainá, xi Jerusalén x̄itse 'mì xi k̄jinchrobà-ne ngajm̄i ñánda t̄jna Nainá, t̄ikoā sk̄ijnoa 'ín x̄itse xi ts'an. ¹³ Ndaà t̄iná'yaà koni tsò In̄imā Tsjeè-la Nainá nga t̄ichja-la naxandá-na.”

Kjoa xi kisinè-la naxandá-la Cristo ján Laodicea

¹⁴ 'Chj̄i jngoò-la xojon jè àkjale-la naxandá-na xi t̄jna ján Laodicea: “Kíí tsò jè xi s̄jngoò yije 'én-la Nainá, jè xi nguì 'én kix̄i tsj̄á, jè xi nguì jè sobà kjoakix̄i, jè xi tsibíts'ia ngats'iì xi tsibindaà Nainá. K'oaá tsò: ¹⁵ 'An, be-ná mé kjoa xi t̄itsa'nè; m̄itsà 'nchán t̄itsajnaà n̄i m̄itsà tsjè t̄itsajnaà nga m̄itsà kondra t̄itsajnakō-ná ko m̄itsà ndaà onguít'aà-ná. Ndaà-là t̄jín tsà nguì ndaà onguít'aà-ná ko tsà majin tsà nguì kondra t̄itsajnakō-ná. ¹⁶ Tanga jñò, nga isò-nò, m̄itsà 'nchán t̄itsajnaà n̄i m̄itsà tsjè t̄itsajnaà, k'oaá ma-ne nga ndsoba sk̄ihisò-na. ¹⁷ Jñò k'oaá bixón: X̄it̄a nchiná-nájen; ndaà t̄itsajna-jen; n̄imé chijat'aà-najen. Tanga m̄ik̄i 'ya nga 'iín t̄itsajnaà; n̄imé xi t̄jín-nò; x̄it̄a ima-nò; m̄ik̄i tsejèn-nò; laká t̄itsjoò. ¹⁸ 'An, k'oaá xan-nò, 'aán t̄indát'aà-ná ton oro xi ni'ín kjòtsjeè-ne mé-ne nga x̄it̄a nchiná kōma-nò. T̄ikoā 'aán t̄indát'aà-ná nikje tsjeè xi chroba kjoàn mé-ne nga m̄i kosobà-nò nga t̄itsajna laká yijo-nò. T̄ikoā t̄inguioò x̄k̄i colirio jñà xkoòn mé-ne nga ndaà kotsejèn-nò. ¹⁹ Ngats'iì x̄it̄a xi 'an matsjake, ot̄ikō-ná t̄ikoā tsjaà-la kjo'in. Mochjeén-né nga tj̄i-là nga'ñó yijo-nò; t̄ikájno

jé-nò, kì tì jé binchaàtsji-nò. ²⁰ 'An, yaá tìjnajtoa xotjoa ni'ya nga tìchjà; tsà t́ín i'nga xi kji'nchré-na, koa tsà skíx'a xotjoa ni'ya-la, komaá kjoahas'en nga kókjen-koaa, tìkoa jè, kòkjen-ko-na. ²¹ Jñà xi s̀ikijne tsjaà'nde-la nga ya kítsajnat'aà-na ñánda t́jna íxile ts'e kjótíxoma-na koni s'ín 'an jye kisikijne nga yaá t́jnat'aà-la Na'èn-na ñánda t́jna íxile ts'e kjótíxoma-la. ²² Ndaà t́iná'yaá koni tsò Inima Tsjeè-la Nainá nga t́chja-la naxandá-na.”

4

Kós'in yaxkón Nainá ján ngajmì

¹ Xi jye komà iskan, kiskoòtsejèn ján i'ngaá; kìjtseè ngajmì nga t́ix'á jngoò xotjoa ko jè jta xi k'i'nchré ítjòn-la xi koa tsò koni chrjo trompeta, kitsò-na:

—Nchrobá mijìn ijndé; kokoò-lè kjoa xi koma k'e nga jye komà yije kjoa xi tíma i'ndeì.

² Tà ǹitoón j'ìi kanè jngoò k'a-na jè nga'ñó-la Inima Tsjeè-la Nainá; kìjtseè jngoaa íxile xi t́jna ngajmì ñánda t́satíxoma. Jé íxile jè, t́jna jngoò xi ya t́jnasòn. ³ Jè xi t́jnasòn íxile nga tíhotíxoma, k'oaá kji ote tsejèn koni kji ndajo chjí xi 'mì jaspe, o koni kji ndajo chjí xi 'mì cornalina. Ya indii-la íxile s̀ijnandiì jngoò-la ijñe xi okji ote tsejèn koni kji ndajo chjí xi 'mì esmeralda. ⁴ Tíyaá-ne nga jngoò itjandiì-la ñánda t́jna xi t́jnasòn íxile nga tíhotíxoma, kaàn ñijòn íxile 'ncha isa ñánda t́satíxoma, tìkoa kaàn ñijòn xita jchínga t́tsajnasòn xi nguì chroba kjoàn nikje xi kikjá; saà corona kichá oro t́j'a sko. ⁵ Ya ñánda t́jna xi t́jnasòn íxile nga tíhotíxoma, bitjo ni'ín ch'on, ko ts'ìin ch'on, tìkoa na'yà-la jta xi

chja; itoò ni'ín xi síhiseèn títi ya nguixkòn íxile; jñà ni'ín, jñà inima tsjeè-la Nainá xi itoò ma-ne. ⁶ Ya nguixkòn jè xi tíjnasòn íxile nga tíhotíxoma, kijina jngoò ndáchikon xi koni kji chĩtsín kji xi 'ñó ote.

Ya it'aà íxile kò ya indii-la, ñijòn ma xi títsajnakon; kóhokji ijton íts'in kò ya indso'ba, xki xi ján tjit'aà xkòn. ⁷ Jè xi tíjna ítjòn jñà xi títsajnakon, k'oaá kji koni kjoàn xa. Xi ma-ne jò, koni kji nchraja ki'ndí kji. Xi ma-ne jàn, isén-la xitaá tjín-la. Xi ma-ne ñijòn, k'oaá kji koni kji ja xi tsó'bajin isén. ⁸ Jñà xi ñijòn ma-ne xi títsajnakon nga jngoò ìjngoò, joòn jngaá tjín-la. 'Nó kjín ma-ne xkòn xi tjín nga jngoò itjandii-la kò iya-la. Mikii síkjáya kò nachrjein kò nitjen nga tsò:

Tsjeè-né, tsjeè-né, tsjeè-né jè Na'èn-ná xi Nainá,
xi ta jè tajngoó xi 'ñó tse nga'ño tjín-la,
jè xi tsibijna, jè xi tíjna kò jè xi kjoii ìjngoò k'a-ne.

⁹ Jñà xi títsajnakon nchitsjá-la kjoajeya, nchitsjá-la kjondaà, kò nchibeèxkón jè xi tíjnasòn íxile jè xi tíjnakon nitá kjé-ne. K'e k'oa nchis'ín, ¹⁰ jñá xita jchínga xi kaàn ñijòn ma-ne bincha-xkó'nchi-ñiat'aà-la jè xi tíjnasòn íxile tikoá beèxkón-né jè xi tíjnakon nitá mé nachrjein-ne. Síkatsjoò corona-la ya nguixkòn jè xi tíjnasòn íxile nga tsò:

¹¹ Na'èn, ok'ín-lè nga ji tjoé-lè kjoajeya, nga jchaxkón-lè,
nga tsiji yije-né nga'ño xi tjín,
nga ji tsibindii ngats'ii tsojmi xi tjín,
nga k'oaá s'ín kjòmejèn-lè nga tjín yije tsojmi
kò nga kisindaà kóhotjín xi tjín.

5

Xojon xi maxkóya ko jè Orrè

¹ 'An, kùjtseè jè xi tíjnasòn íxile nga tíhotíxoma, kjinaya tsja kixi jngoò xojon xi kjixkóya xi kitjei-jno iya-la ko ngatsejèn-la ko itoò k'a tji'ño ñánda jncha-la sello nga jngoò ijngoò k'a. ² Kùjtseè jngoàà àkjale xi tse nga'ño tjín-la, xi 'ño kiichja nga kitsò:

—Yá xi ok'in-la nga skíx'a jè xojon koa komà-la kjoaáxin jña sello xi jncha-la.

³ Tanga nijá kisakò xi komà-la nga kiskíx'a jè xojon, ni mìkiì ma kotsejèn-la nga kot'aà kó tsò 'én xi tji't'aà; nijngoò kisakò ján ngajmù, nijngoò kisakò it'aà nangui, koa nijngoò kisakò ingui nangui. ⁴ 'An, 'ño kiskindàya nga ko ndáxkoaàn k'e nga kùjtseè nga nijngoò kjòtsji xi ok'in-la nga kiskíx'a jè xojon nga ma kot'aà kó tsò 'én xi tji't'aà. ⁵ Jña xita jchínga xi kaàn ñijòn ma-ne, jngoò xi kitsò-na:

—Kì chihindáya-jèn. Tíjna xi 'mì: Xa-la xita naxandá Judá, xi tikoá 'mì: Tje-la xitaxá ítjòn David, nga jè xi jye kisikijne-la kondra-la. Jè xi ok'in-la nga skíjndaya jè xojon koa koma kjoaáxin sello-la xi itoò ma-ne.

⁶ K'eé kùjtseè jngoò Orrè nga síjna ya jngoò osen-la ñánda tíjna xi tíjnasòn íxile nga tíhotíxoma, ko ñánda títsajna jña xi ñijòn ma-ne xi títsajnakon, ko ñánda títsajna xita jchínga xi kaàn ñijòn ma-ne. Jè Orrè, k'oaá kji koni tsà jye k'en; itoò ma nchrajá-la tikoá itoò ma xkon; jña xkon, jña inima-la Nainá xi itoò ma-ne xi kinikasén nga tíjtsa isò'nde. ⁷ Jè Orrè, kiskoé jè xojon xi kjinaya tsja kixi jè xi tíjnasòn íxile nga tíhotíxoma. ⁸ Jè Orrè, k'e nga jye kiskoé xojon jè, jña xi ñijòn ma-ne

xi títsajnakon kò jñà xítà jchínga xi kaàn ñijòn ma-ne chinchaxkó'nchi-ñiat'aà-la nga nguixkòn Orrè. Ngats'ìi saà ní'ño arpaá 'ya kò chítín xi nguì oro xi tíya chrjongó-la nainá. Jè chrjongó-la nainá jñà xi kjoa bítsi'ba-la jñà xítà-la Nainá. ⁹ Kiseè jngò sò xítse xi tsò:

Ok'ín-lè nga ngaji chjoí jè xojòn, chjaàxìn sello-la nga jì kinìk'en-lè, nga kò jnì-lè tsibíchjítì xítà xi yà itjokàjìn-ne ngats'ìi tje-la xítà xi tjín isò'nde, ngats'ìi 'én xi tjín isò'nde, ngats'ìi naxandá xi tjín, kò ngats'ìi nangui xi tjín isò'nde mé-ne nga yà kichja-ne it'aà ts'e Nainá.

¹⁰ Kò xítaxá ítjòn ki'nì kò nò'miì ki'nì nga ma sùkitasòn-la Nainá, koa jñà kotìxoma jì it'aà nangui.

¹¹ K'e nga kiskoòtsejèn, ki'nchrè jta-la jñà àkjale xi kjiìn jchán millón ma-ne xi nchiseè ya indii-la ñánda tíjna xi tíjnasòn íxile nga tíhotìxoma kò ya ñánda títsajna jñà xi títsajnakon kò jñà xítà jchínga.

¹² 'Ñó jchán nchichja nga tsò:

Jè Orrè xi kinìk'en, ok'ín-la nga jchaxkón nga ts'e yije-né nga'ño xi tjín, kò kjoa nchiná kò kjoa chjine, kò jè tsjá nga'ño, ndaà kàtayaxkón, jeya kàtìjna kò 'nga kàtìjna.

¹³ Ngats'ìi xi xó kisindaà-ne xi tjín ngajmiì, xi tjín jì it'aà nangui kò ya ingui nangui, kò xi tjín jjiìn ndáchikon, ki'nchrè-la nga tsò: Jè xi tíjnasòn íxile kò Orrè, 'nga kàtìtsajna; kàtayaxkón, jeya kàtìtsajna,

kàtas'e-la nga'ñó n̄ita mé nàchrjein-ne.

¹⁴ Jñà xi ñijòn ma-ne xi títsajnakon, kitsò:

—¡K'oa's'ín kàtama!

Jñà x̄ita jchínga xi kaàn ñijòn ma-ne chinchaxkó'nchi-ñiat'aà-la nga jeya kisikíjna jè xi tíjnakon n̄ita mé nàchrjein-ne.

6

Sello xi itoò ma-ne

¹ K'eé k̄jtseè jè Orrè nga jaàxìn ítjòn jngoò sello. Ikjoàn ki'nchrè jngoò-la jñà xi ñijòn ma-ne xi títsajnakon nga kiichja. K'oaá kitsò koni ma ch'on nga one, kitsò:

—Nchroboí!

² Kiskoòtsejèn, k'eé k̄jtseè jngoò kohòyo xi chroba kji; jè xi tíjnakjá-la kohòyo, kjinaya tsja jngoò arco xi mochjeén k'e nga tjín kjojchán; ikjoàn kitjoé jngoò-la corona xi si'a sko x̄ita k'e nga síkijne; kii nga jye kisikijne mé-ne nga siikijne isa-ne.

³ Jè Orrè, k'e nga jaàxìn sello xi ma-ne jò, ki'nchrè-la jè xi ma-ne jò xi títsajnakon nga kitsò:

—¡Nchroboí!

⁴ Kò ìjngoò kohòyo itjo xi inì kji; jè xi tíjnakjá-la, kitjoé jngoò-la k̄icha ndojò xi 'ñó je kji, t̄ikoa kitjoé-la nga'ñó nga kàtjaàxìn kjoa'nchán xi tjín it'aà nangui mé-ne nga kàtasík'en-ne xíkjín jñà x̄ita.

⁵ Jè Orrè, k'e nga jaàxìn sello xi ma-ne jàn, ki'nchrè-la jè xi ma-ne jàn xi títsajnakon nga kitsò:

—¡Nchroboí!

K'e nga kiskoòtsejèn, k̄jtseè ìjngoò kohòyo xi jmà kji; jè xi tíjnakjá-la kohòyo, jngoò libra tjíya tsja jè xi machibaya-ne tsojmì. ⁶ Ki'nchrè jngoò-la jta ya

jngoò osen-la jñà xi ñijòn ma-ne xi títsajnakon nga kitsò:

—Nga jngoò nisoò trigo, jngoò nàchrjein chjì-la chì'nda tjín-ne. Kò nga jàn nisoò cebada, tìkooá jngoò nàchrjein chjì-la chì'nda tjín-ne. Kì tà nìkìts'ón-jen jè asitì kò vino.

⁷ Jè Orrè, k'e nga jaàxìn sello xi ma-ne ñijòn, ki'nchrè jta-la jè xi ma-ne ñijòn xi títsajnakon nga kitsò:

—jNchroboí!

⁸ Kiskoòtsejèn, kìjtseè jngoaa kohòyo xi sinè kji. Jè xi tjínakjá-la, Kjoabiyaà 'mì 'ín-la; ìjngoò tjìngui-la xi I'nde ts'e Mik'en 'mì. Kitjoé-la kjoíxoma nga ngats'ì xita xi tjín isò'nde, xi ñijòn xita, jngoò kiyá xi kjoa ts'e kjojchán, kjoa ts'e kjinchrá, kjoa ts'e ch'in kò kjoa ts'e cho ts'en xi tjín jjiin ijñá sùk'en.

⁹ Jè Orrè, k'e nga jaàxìn sello xi ma-ne 'òn, 'an kìjtseè ya ìngui ímixa tsjeè-la Nainá títsajna jñà xita xi kinik'en nga koií kjoa-la 'én-la Nainá, tìkoa koií kjoa-la nga kixi kitsjaà 'én-la Nainá. ¹⁰ N'ó nchichja nga tsò:

—Na'èn xi jì sabà tìhotìxomai, jì xi nguì tsjeè tijni kò nguì kjokixi, skanda mé nàchrjein kíndaajìin-la nga k'oi-la kjo'in jñà xita xi tjín ján isò'nde, jñà xi kisik'en-najen.

¹¹ K'ée kits'ìi-la nikje xi chroba kjoàn, ki'mì-la nga kàtasíkjáya chiba nàchrjein isa skanda k'e nga kojngoò jñà xi 'ndse joó it'aà ts'e Cristo xi tìkoa ngàsòn xá-la Nainá kiyájìin-ne.

¹² Jè Orrè, k'e nga jaàxìn sello xi ma-ne joòn, kiskoòtsejèn nga j'ìi jngoò ch'ón xi 'ñó ts'a. Jè ts'oi, jmà kji komà koni nikje jmà, kò jè sá, inì kji komà

koni jní. ¹³ Jñà ni'ño xi t́jín ngajmii, chixòt'aà nangui koni ma jñà toò ikò xkoén nga bixòngui k'e nga 'ño 'ba tjo. ¹⁴ Jè ngajmii, k'oaá s'ín kichijà koni jngoò xojon xi ma maxkóya; ngats'iì jñà nindoò kò nangui jiiin-nda xi t́jín jiiin ndáchikon, jahatjìya-la ya i'nde ñánda títsajna. ¹⁵ Jñà xitaxá ítjòn xi t́jín isò'nde, kò xitá xi 'ño ndaà yaxkon-la, kò xitá nchiná, kò xitá sko-la soldado, kò xitá xi tse nga'ño t́jín-la, kò xitá chi'nda, kò xitá xi títsajnandejí nga mìtsà nei t́jín-la, yaá tsibìtsajna'ma ñánda t́jín nguijo kò naxi xi t́jín-la nindoò. ¹⁶ Kitsò-la jñà nindoò kò jñà naxi:

—Tikatsjònè-nájen yijo-nò, tijtsa'ma-nájen mé-ne nga mìkiì skoe-nájen jè xi tíjnasòn íxile nga tíhotíxoma kò t́ikoá kítajna'ma-lajen kjoajti-la kò kjo'in xi tsjá jè Orrè. ¹⁷ Nga jye ijchò nachrjein-la Nainá kò Orrè nga kò kjojtí-la, 'ño tse kjo'in tsjá. ¿Yá xi koma kichìkjoako-la?

7

Jñà chi'nda-la Nainá xi t́jít'aà chiba-la

¹ Xi jye komà iskan kjoa koi, 'an kítseè ñijòn àkjale xi jncha kixi nga ñijòn chrjangui-la isò'nde xi nchibíchjoàhikon-la tjo mé-ne nga mì tì kiì k'oa-ne ya isòn isò'nde kò isòn ndáchikon, t́ikoá nijngoò yá siiníyá-la. ² T́ikoá kítseè ijngoà àkjale xi t́inchrobá-ne ñánda bitjokàtji-ne ts'oi xi 'ya jngoò kichá ts'e Nainá xi t́jnakon xi ma sit'aà chiba-la xitá. 'Ñó kiichja-la jñà àkjale xi ñijòn ma-ne xi jye kitjoé-la nga'ño nga tsjá ch'in-la isò'nde kò ndáchikon. ³ Kitsò-la:

—Kì tà chjà ch'in 'bì-lá isò'nde kò ndáchikon kò yá, skanda k'e-né nga jye sít'aà chiba-la ya tjen-la jñà xi chì'nda-la Nainá.

⁴ Kì'nchrè-la kótjín ma-ne jñà xita xi kisit'aà chiba-la, jngoò sindo kò ichán ñijòn jmiì ma-ne, ngats'ì tje-la xita Israel. ⁵ Jñà ngats'ì tje-la xita koi xi kisit'aà chiba-la: jñà tje-la Judá, tejo jmiì ma-ne. Jñà tje-la Rubén, tejo jmiì ma-ne. Jñà tje-la Gad, tejo jmiì ma-ne. ⁶ Jñà tje-la Aser, tejo jmiì ma-ne. Jñà tje-la Neftalí, tejo jmiì ma-ne. Jñà tje-la Manasés, tejo jmiì ma-ne. ⁷ Jñà tje-la Simeón, tejo jmiì ma-ne. Jñà tje-la Leví, tejo jmiì ma-ne. Jñà tje-la Isacar, tejo jmiì ma-ne. ⁸ Jñà tje-la Zabulón, tejo jmiì ma-ne. Jñà tje-la José, tejo jmiì ma-ne. Jñà tje-la Benjamín, tejo jmiì ma-ne.

Xita xi kjin jchán ma-ne xi chroba kjoàn nikje xi íkjá

⁹ Xi jye komà, k'e nga kiskoòtsejèn, kjin jchán xita kijtseè; ñiyá xi maxkeya-la. Yaá títsajna xita xi ya inchrobàjìin-ne ngats'ì nangui xi tjin isò'nde, kò ngats'ì tje-la xita xi tjin isò'nde, kò títsajna xita xi chja ngats'ì 'én xi tjin, kò xita xi ya nchrobá-ne ngats'ì naxandá xi tjin. Jñà xita koi, 'ncha kixi-né nga nguixkòn xi tíjnasòn íxile nga tíhotíxoma tikoá nga nguixkòn jè Orrè. Saà nikje chrobaá íkjá kò saà xkajén kjiya tsja. ¹⁰ Ngats'ì xita koi, 'ño jchán nchichja nga tsò:

Jè Na'èn-ná xi Nainá xi tíjnasòn íxile ñánda nga tíhotíxoma
kò jè Orrè,
tsachrjekàjìin-ná kjo'in.

11 Ngats'ìi jǎ̀ òkjale 'ncha kixi-né ya ìndiù-la ñánda tǐjna xi tǐjnasòn íxile nga tíhotíxoma kò ya ñánda tǐtsajna jǎ̀ xitá jchínga xi kaàn ñijòn ma-ne, kò jǎ̀ xi ñijòn ma-ne xi tǐtsajnakon. Chinchaxkó'nchi-ñiat'aà-la skanda it'aà nangui nga kijt-seèxkón Nainá. ¹² Kitsò:

K'oaá s'ín kátama.

Nainá 'nó tǐjn-la kjoa machikon-t'in, kò kjoa jeya,
kò kjoa chjine,

tǐjn-la kjondaà, 'nó 'nga tǐjna, tse nga'ño tǐjn-la,
kò tǐjn-la kjoíxoma.

K'oas'ín kátama skanda nitá mé nàchrjein-ne.

¹³ K'eé kiìchja jngoò-na jǎ̀ xitá jchínga, kitsò:

—Jǎ̀ xitá xi chroba kjoàn nikje xi íká, zyá xitá-ne, ñánda kòf'ì-ne?

¹⁴ 'An, kixan-la:

—Ngají tǐjìn-lè na'èn.

Jè kitsò-na:

—Jǎ̀ xitá koi xi tsatojìin kjo'in jè nàchrjein k'e nga 'nó tse kjo'in kis'e. Kisìtsjeè nikje-la nga kò jní-la Orrè-la Nainá kisìchroba-ne. ¹⁵ Koí kjoa-la nga ya tǐtsajna-ne nguixkòn jè xi tǐjnasòn íxile nga tíhotíxoma kò nàchrjein kò nitjen sís'in-la ya ingo-la. Jè xi tǐjnasòn íxile yaá kíjnajìin osen kjit'aà-la nga sìikinda. ¹⁶ Mì tì kii kjinchrá sìikjeíin-ne kò mì tì kii koxínda-la. Kò mì tì kii kokà-ne yijo-la jè ndobá-la ts'oi k'e nga 'nó matsjè. ¹⁷ Nga jè Orrè xi tǐjna jngoò osen-la ñánda tǐjna xi tǐjnasòn íxile nga tíhotíxoma, jè sìikinda koni s'ín makinda orrè; jè kjoiko ñánda tǐbitjo nandá xi tǐjnakon. Nainá sìixìjno yije ndáxkòn jǎ̀ xitá koi.

8

Xi ma-ne itoò sello

¹ Jè Orrè, k'e nga jaàxìn jè sello xi ma-ne itoò, osen-la hora jñá kis'e ján ngajmii. ² Ikjoàn kijtseè jñà àkjale xi itoò ma-ne xi 'ncha kixi nguixkon Nainá, jngoò chrjo trompeta kits'ii-la nga jngoò ìjngoò. ³ K'eé j'ii ìjngoò àkjale xi 'ya jngoò kicha xi nguì oro jè xi tjíya chrjongó-la Nainá. Tsašína kixi ya it'aà ímíxa tsjeè-la Nainá, ikjoàn tse chrjongó-la Nainá kits'ii-la mé-ne nga ya kisijngoòko-ne jè kjoa bìtsi'ba-la jñà xíta-la Nainá. Yaá tsaká ya isòn ímíxa tsjeè xi nguì oro xi tíjna ya nguixkon jè xi tíjnasòn íxile ñánda tíhotíxoma. ⁴ Jè ni'ndi-la chrjongó-la nainá ko kjoa bìtsi'ba-la xíta-la Nainá tsijin-né ya tsja jè àkjale ya nguixkon Nainá. ⁵ Jè àkjale kiskoé jè kicha xi tíya chrjongó-la Nainá, chinchá-ísa xá'í xi títisòn ya it'aà ímíxa tsjeè-la Nainá. Ikjoàn kisikatjen-sòn isò'nde; 'ñó kits'iin ch'on, kina'ya-la jta, ki'ya-la ni'ín ch'on, ko ts'a ch'on.

Jñà chrjo trompeta

⁶ Jñà àkjale xi itoò ma-ne ko itoò chrjo trompeta tjíma'ya tsibítsajnandaà nga sìkkindáya.

⁷ Jè àkjale xi síjna ítjòn kisìkkindáya chrjo-la. Ikjoàn ts'a jtsí ndajo ko ni'ín xi tsjájin jní; ján kisikasén it'aà nangui. Jè xi ma-ne jàn-ya-la isò'nde, jngoòya kitì; k'oa ti tjín kitì jñà yá; kitì yije xka xkoén.

⁸ Jè xi ma-ne jò àkjale kisìkkindáya chrjo-la. Ko jngoò xi okji koni jngoò nindoò xi je kji xi títi, yaá kinìkatjen-jìin ndáchikon. Nga jàn-ya-la ndáchikon, jngoòya, jní komà. ⁹ Jñà cho xi tjín-nguì ndáchikon,

jngoòya k'en xi ma-ne jàn-ya чо. K'oaá t̄is'ín komà j̄nà chitso, jngoòya chixoña xi ma-ne jàn-ya chitso.

¹⁰ Jè xi ma-ne jàn àkjale kisikjindáya chrjo-la. Jngoò ni'ño xi 'ñó je kji xi títjnga, kiskaàngui-ne nga-jmì. Jè ni'ño jè, jngoòya xajngá nandá kiskaàjiin xi ma-ne jàn-ya xajngá nandá kò ya ñánda títjo nandá. ¹¹ Jè 'ín-la ni'ño jè, xka tsja 'mì. Kò jè nandá, jngoòya kjòtsja, jè xi ma-ne jàn-ya nandá. Kjín jchán x̄it̄a k'en nga kjòtsja nandá.

¹² Jè xi ma-ne ñijòn àkjale kisikjindáya chrjo-la. Ikjoàn jngoòya kitsi'on jè ts'oi xi ma-ne jàn-ya yijo-la; kò k'oaá t̄is'ín komà jè sá kò ni'ño. Ikjoàn kòjñò jngoòya jè ts'oi kò sá kò ni'ño. Koà jngoòya kòjñò jè nàchrjein xi jàn-ya tjín-ne; kò k'oaá t̄is'ín komà k'e nga n̄itjen; mì t̄i kii kjòhiseèn-ne.

¹³ K'e nga kiskoòtsejèn, ki'nchrè jngoò-la ja xi kitoòtjen ján j̄jiin isén. 'Nó kiichja nga kitsò:

—Ima xó-ne, ima xó-ne, ima xó-ne j̄nà x̄it̄a xi tjín ján isò'nde, taxki 'oón komat'in k'e nga skindàya chrjo-la j̄nà àkjale xi ngui jàn chija-isa.

9

Chrjo trompeta xi ma-ne 'òn

¹ Jè xi ma-ne 'òn àkjale kisikjindáya chrjo-la; 'an kijtseè jngoaa ni'ño xi kiskaàngui-ne ngajmì skanda it'aà nangui. Ikjoàn kjòngatsja jè ibi ts'e n̄itjan. ² Kiskix'a jè n̄itjan. K'oaá s'ín itjo n̄i'ndi koni tsà ts'e ngajá xi 'ñó ì kjoàn. Jè n̄i'ndi xi itjo, kisijñò jè ts'oi kò j̄jiin isén. ³ Jè n̄i'ndi, yaá itjoiin чо langosta xi tsangasòn isò'nde; kits'i-là nga'ño nga ma-la k'oe-là x̄it̄a koni чо na'yá xi tjín isò'nde. ⁴ K'oaá s'ín kisatiixoma-la nga mìkì tsjá

ch'in-la ngats'iì xka ijñá xi tjín isò'nde, ko nijngò yá; tà jñà xi koma tsjá ch'in-la jñà xita xi tsjìn-la chiba-la Nainá ya itjòn tjen-la. ⁵ Mikiì kitsjaà'nde-la nga siik'en xita; tà kjo'iín 'òn sá tsjá-la; jè kjo'in xi tsjá, k'oaá ngaya-la koni k'e nga 'bé-la cho na'yá xita nga jìò 'beé. ⁶ Nachrjein koi, jñà xita mejèn-la nga kiyá, tanga mikiì sakò-la kós'ín siik'en yijo-la. 'Nó komejèn-la nga siik'en yijo-la tanga mikiì koma kiyá.

⁷ Jñà cho langosta k'oaá kjoàn isén-la koni kjoàn kohòyo xi binchandaà-la kjojchán. Tjísòn sko koni corona xi nguì oro; isén-la xitaá tjín-la. ⁸ Tsja sko k'oaá kjoàn koni kjoàn ts'e íchjín; ni'ño, k'oaá kjoàn koni ts'e xa. ⁹ Ya isòn inima-la k'oaá kjoàn xi kijtsa koni kicha tájaà xi síkjeén xita kjojchán; jñà jngaá-la k'oaá s'ín na'yà-la nga one koni tsà 'ño kjìn ma carreta xi bín-dofe kohòyo nga ongachikon nga fi kjojchán. ¹⁰ Tjín nditsin koni cho na'yá ko tjín-la na'yá. Jñà nditsin tjín-la nga'ño nga 'òn sá siiki'on xita. ¹¹ Jè xi síjna sko-la cho langosta, jè àkjale ts'e nitjan. Jè 'ín-la àkjale jè, xi 'én hebreo, Abadón 'mì, koa xi 'én griego, Apolión 'mì. [Jñà 'ín koi, tsòyaá-ne: jè xi síkits'óna.]

¹² Jyeé tsato kjo'in xi tjina itjòn xi taxki 'oon komàt'in xita; tanga nguì jò chija xi sa nchrobá.

Chrjo trompeta xi ma-ne joòn

¹³ Jè xi ma-ne joòn àkjale kisikjindáya chrjo-la; k'eé ki'nchrè jngoò-la jta xi ya itjojiiin-ne nga ñijòn nchrajá-la jè ímixa tsjeè xi nguì oro jè xi síjna nguixkon Nainá ¹⁴ nga kitsò-la jè àkjale xi ma-ne joòn, xi kjiya chrjo tsja:

—Chjíjnda'ñoí jñà àkjale xi ñijòn ma-ne xi tjit'aà'ñoó ya chraña-la jè nandá xajngá je Éufrates.

¹⁵ K'eé kitjájnda'ñoó jñà àkjale xi ñijòn ma-ne xi jye k'oas'ín títsajnándaà jè hora, jè nachrjein, jè sá kò jè nó, mé-ne nga jngoóya sük'en-ne xita xi ma-ne jàn-ya ngats'ii xita xi tjin. ¹⁶ 'An, ki'nchrè-la kótjin ma-ne jñà xita kjojchán xi kohòyo títsajnakjá-la; jò sindo millón ma-ne.

¹⁷ K'oaá s'ín tsatsejèn-na jñà kohòyo kò xita xi títsajnakjá-la nga kichá tájaà kijtsa inima-la xi inì kjoàn koni ni'ín, xi azul kjoàn koni zafiro, kò xi sinè kjoàn koni azufre. Jñà skò kohòyo, k'oaá kjoàn koni skò xa; kò ya tso'ba, ni'ín bitjo, ni'ndii bitjo, kò azufre bitjo. ¹⁸ Jè kjoa-la nga ingajàn kjo'in koi, jngoò ya k'en xita xi jàn ya ngats'ii xita xi tjin. Jè kisik'en jè ni'ín, ni'ndi kò azufre xi bitjo-ne tso'ba kohòyo. ¹⁹ Nga'ñoó xi tjin-la kohòyo, yaá tjí'a tso'ba kò itjòn nditsin, nga jñà nditsin k'oaá kjoàn koni kjoàn ye; koa jñà skò síki'on-ne jñà xita.

²⁰ Jñà xita xi tsiningui-ne xi mìkìl k'en k'e nga jye tsato yije kjo'in koi, mìkìl kisikájno jé-la nga mì tì jé kohótsji-ne; takó jñà kijtseèxkón inima ch'o-la nejí, kò jñà isén xi Nainá tsò-la xi kichá oro, plata, bronze, ndajo kò yá, jñà xi mìkìl tsejèn-la kò xi mìkìl 'nchré kò xi mìkìl ma fi. ²¹ Jñà xita koi, mìkìl kisikájno jé-la nga mì tì jé kohótsji-ne nga xita sík'en, nga ma-la bíndaà, kò nga kjoa chijngui s'ín, kò kjoa chijé.

10

Àkjale xi kjiya tsja jngoò xojon libro jtobá

1 Ìjngoò àkjalẹ̀ kịjtseè-ìsa xi t́jín-là nga'ńó xi t́inchrobájen-ne ngajmìi nga ifi tsátijno; jẹ̀ skọ̀ kịnasòn jngoò ijñe; isén-là k'oaá kji koni ts'oi; jñà ndsokọ̀ k'oaá s'ín tsejèn koni tsà ni'ín xi ncha kixi nga títi. ² Kjinaya tsja jngoò xojon xi jtobá kji xi jye kitjájndaya. Jè ndsokọ̀ kixi tsasíjnajiìn ya ndáchikon kọ̀ jè ndsokọ̀ ngaskón tsasíjnasòn nangui. ³ K'oaá s'ín 'ńó kiichja koni tsò xa k'e nga kjindáya; k'e nga jye kiichja, itoò ch'on kina'ya jta-là nga tikoá kiichja. ⁴ K'e nga jye jane ch'on xi itoò kits'iin, 'an tijnandaà-ná nga mejèn-na skijno jngoaà xojon, tanga ki'nchrè jngoò-là jta xi ngajmìi inchrobà-ne xi kitsò-na:

—Jñà 'én xi káchja ch'on xi itoò kats'iin, 'maá tikíjni; kì xojooǹ bìt'ii.

⁵ Jè àkjalẹ̀ xi 'an kịjtseè nga ya síjnajiìn jngoò ndsokọ̀ ndáchikon kọ̀ xi ìjngoò ndsokọ̀ ya síjnasòn nangui, kiskímiì'nga tsja kixi ján ngajmìi, ⁶ kitsjaà 'én-la it'aà ts'e Nainá xi tíjnakon nita mé nàchrjein-ne, jè xi tsibíndaà ngajmìi, nangui kọ̀ ndáchikon, ngats'ii tsojmì xi ya t́jín, kitsò:

—Mì tì kii s'e isa-ne nàchrjein. ⁷ K'e nga kichóya nàchrjein-là nga koiits'ia jè àkjalẹ̀ xi ma-ne itoò nga siikjindáya chrjo-là, jè kjoa'ma-là Nainá kítasòn-né koni s'ín kitsò jñà xita ch'i'nda-là xi kiichja ngajo-là.

⁸ Jè jta xi ki'nchrè ítjòn-là xi ngajmìi inchrobà-ne, ìjngoò k'a kiichja-na kitsò:

—T'in, choí jè xojon xi jtobá kji xi jye kitjájndaya nga kjinaya tsja jè àkjalẹ̀ xi síjnakixi isòn ndáchikon kọ̀ isòn nangui.

⁹ Kiikoan jè àkjalẹ̀, kixan-là:

—Tjii-ná jè xojon jtobá xi kjinaya ndseii.

Kitsò-na:

—Chjoí, ikjoàn chinii; ján iya indso'boi kotsjaya-né, tanga ya i'a ndso'boi, ixii koma-lè koni tsà tsjén.

¹⁰ Kiskoé jè xojon xi kjiya tsja jè àkjale. K'e nga kiskínee, kisihixil'á ndsoba koni tsà tsjén; tanga ján iya indso'bà kjòtsja-né. ¹¹ Ki'mì-na:

—Mochjeén-né nga iingoò k'a kinókjoaya ngajo-la Nainá mé kjoa xi komat'in jña xita xi kjìn naxandá nchrobá-ne kò xi kjìn nangui chja-ne kò xi kjìn skoya 'én chja, kò mé kjoa xi komat'in xitaxá ítjòn xi tjín isò'nde.

11

Jò ma xita xi tsjá 'én it'aà ts'e Cristo

¹ K'ée kits'iì jngoò-na yá xi ma machibaya-ne, xi k'oà kji koni kjoàn yá nise. Ki'mì-na:

—Tisítjün, tichibayi jè ingo ítjòn-la Nainá kò jè imixa tsjeè-la. Tixkeyi kótjín ma-ne jña xita xi ya beèxkón Nainá. ² Jè nditsin xi kijnat'aà-la ingo, kii kii nichibayi nga jña kitjoé-la xi taxki xita xi mìtsà xita judío. Jña xita koi, ichán jò sá kotixoma ya Jerusalén xi i'nde tsjeè-la Nainá. ³ 'Aán siikasén ingajò xita-na xi tsjá 'én it'aà ts'an nga kichjaya jngoò jmii kò jò sindo kò jàn-kaàn nachrjein; kò jña nikje xi kòkjá, nikje jmà kjoàn xi ts'e kjoaba.

⁴ Jña ingajò xita xi tsjá 'én, jña-né ingajò yá olivo kò ingajò kichá candelero xi jncha kixi nguixkõn Nainá xi otixoma-la isò'nde. ⁵ Tsà yá xi mejèn-la siki'on xita koi; ni'in kochrje tso'ba xi jngoò k'a kòkà jña xi kondra-la. K'oáá s'in kiyá yije, nita yá-ne xi mejèn-la siki'on. ⁶ Jña xita koi tjín-la

nga'ño nga ma-la kùichjoà-la ngajmù mè-ne mì tì kù k'oa-ne jtsí jñà nàchrjein k'e nga kichjaya. Tìkooá tjin-la nga'ño it'aà ts'e nandá nga ma-la nga jní s'iin; kò komaá-la kjin skoya kjo'in tsjá-la xita isò'nde; komaá-la nga kos'in s'iin nita kótjin k'a mejèn-la nga s'iin. ⁷ Ingajò xita koi, k'e nga jye tsjá 'én-la, jè chò je xi ch'o kji xi bitjomijn-ne ya nitjan jño, skaàn-kò-né, kò sikkijne-la, ikjoàn kiyá ingajò xita koi. ⁸ Jñà yijo-la xita koi, yaá sijijò osen nditsin-la naxandá ítjòn, ñánda kisit'aà krò Nà'èn-ná. Jè 'ín-la naxandá ítjòn xi okji, k'oaá s'in ngaya-la koni Sodoma, o Egipto. ⁹ Xita xi ya inchrobàjijn-ne naxandá xi tjin isò'nde, kò ngats'ii tje-la xita xi tjin isò'nde, kò xita xi chja ngats'ii 'én xi tjin, kò xita xi ya nchrobá-ne ngats'ii nangui xi tjin isò'nde, ján nàchrjein osen skótsejèn-jno yijo-la mik'en; kò mìkì tsjá'nde nga sijn jñà xita koi xi jò ma-ne. ¹⁰ Jñà xita xi tjin isò'nde kotsjaá-la nga jye k'en xita koi; tsjá kjotjò-la tsojmì xita xikjin. Koií k'oas'in s'iin-ne nga jñà ingajò xita xi chja ngajo-la Nainá, tsee kjo'in tsjá-la jñà xita isò'nde. ¹¹ K'e nga jye tsato xi ján nàchrjein osen, jè Nainá kisikítsajnakon ìjngò k'a-ne nga jaáya-la; ikjoàn chinchá kixi ìjngò k'a-ne; kò ngats'ii xita xi kijtsee, 'ño jchán kitsakjòn. ¹² Ingajò xita koi kù'nchré jngò-la jta xi 'ño kùichja xi ngajmù inchrobà-ne, kitsò-la:

—Nchrobá-mijn-jno ijndé.

Ikjoàn kùimijn-jin ifi ján ngajmù. Ngats'ii jñà xita kondra-la kijtsee-né. ¹³ Tìk'ée-ne j'ii jngò ch'ón xi 'ño jchán ts'a; jngò ya naxandá chixoña xi ma-ne te ya kóhokji naxandá; kò jè kjoa-la ch'ón,

itoò jmiì x̄it̄a k'en. J̄n̄à x̄it̄a xi tsiningui-ne, ndaà jchán kitsakjòn. I_kjoàn kùichj̄at'aà-l̄a Nainá xi t̄jna ngajmiì nga jeya kisikíjna.

¹⁴ Jyeé tsato kjo'in xi ma-ne jò xi taxk̄i 'oón komàt'in x̄it̄a; tanga nchrobá n̄it̄oón xi ma-ne jàn k'a.

Chrjo trompeta xi ma-ne itoò

¹⁵ Jè xi ma-ne itoò àkjale kisikjindáya chrjo-l̄a; kjín jchán j̄ta kina'yà-l̄a ngajmiì xi 'ñó kùichj̄a nga kitsò: J̄n̄à kjot̄ixoma xi t̄jín isò'nde, jyeé ts'e N̄a'èn-ná xi ot̄ixoma-ná k̄o jè Cristo xi xó kinikasén-ne.

Jè kot̄ixoma n̄it̄a mé n̄achrjein-ne.

¹⁶ J̄n̄à x̄it̄a jchínga xi kaàn ñijòn ma-ne, xi t̄itsajnanè íxile nga nguixk̄on Nainá, chinchaxkó'nchi-ñiat'aà-l̄a nga kijtseèxkón Nainá. ¹⁷ Kitsò:

N̄a'èn xi Nainá 'mì-lè.

Ndaà chjì-lè nga ta j̄i t̄a jngoò-né xi 'ñó tse nga'ñó t̄jín-lè,

ngaji xi tijni j̄'ndeì,

k̄o xi tijni skanda kjòtseé,

[k̄o xi s̄a kjoìi j̄jngoò k'a-ne].

Tì'biì-lèjen kjondaà nga jyeé kachjoì nga'ñó xi t̄jín-lè;

k̄o jyeé kòbìts'iì nga j̄i t̄ihot̄ixomai.

¹⁸ J̄n̄à x̄it̄a xi taxk̄i x̄it̄a xi mìtsà x̄it̄a judío jyeé kòjti-l̄a;

tanga jyeé ijchò n̄achrjein-l̄a kjojtì-lè k'e nga j̄i k'oì-l̄a kjo'in x̄it̄a koi,

jè n̄achrjein k'e nga j̄i kíndaàjìin-l̄a j̄n̄à x̄it̄a xi jye k'en

k̄o k'oì-l̄a kjotjò xi ok'in-l̄a nga tjoé-l̄a x̄it̄a ch̄i'nda-lè xi kùichj̄a ngajo-lè

ko jñà x̄it̄a-l̄a Nainá k̄o ngats'ìi xi beèxkón-lè,
 jñà xi jtobá kjoàn k̄o x̄it̄a jchínga.
 S̄ikjehesoìn jñà x̄it̄a xi ma-l̄a s̄ikjehesoìn x̄it̄a
 naxandá isò'nde.

¹⁹ Ján ngajm̄i kitáx'a ì'nde tsjeè-l̄a Nainá; ya
 iya ì'nde tsjeè-l̄a ki'ya-l̄a jè kaxa ts'e kjoa xi
 tsibíndaàjìn Nainá k̄o jñà x̄it̄a. Ìkjoàn jate ni'ín
 ch'òn, kina'yà-l̄a jta, kits'iìn ch'òn, ts'a ch'ón, ts'a
 jtsí ndajo xi 'ño tsiaàn kjoàn.

12

Jè chjoón ko jè ye

¹ Ján ngajm̄i tsatsejèn jngoò kjoxxkón. Jngoò
 chjoón ki'ya-l̄a; jè ts'oi xi ma nikje-l̄a. Jè sá yaá t̄jna
 ingui ndsoko, k̄o jngoò corona t̄jí'a sko xi tejò ni'ño
 t̄jít'aà. ² Jè chjoón, ki'ndí 'ya. 'Nó jchán kjindáya
 nga jye machraña nga jts'ín ki'ndí-l̄a; tseé kjo'in
 t̄síkjeiín nga jye ijchò chiba-l̄a nga jts'ín ki'ndí-l̄a.
³ Ján ngajm̄i ìjngoò kjoxxkón tsatsejèn. Jngoò ye xi
 'ño je kji tsatsejèn. Inì kji, itoò ma sko, k̄o jngoò
 corona itsé t̄jí'a nga jngoò ìjngoò sko. T̄ikoáá te ma
 nchrajá-l̄a. ⁴ Jè nditsin ye, jngoò ya ni'ño tsibíndofe
 xi ma-ne jàn ya ngats'ìi ni'ño xi t̄jín ngajm̄i, ìkjoàn
 tsibítsjot'aà nangui. Jè ye je, tsasijnat'aà-l̄a jè chjoón
 xi tí'beé ki'ndí mé-ne nga skine-ne ki'ndí-l̄a k'e
 nga jye jts'ín. ⁵ Jè chjoón, tsi'beé jngoò ki'ndí x'in
 nga jè kot̄ixoma-l̄a ngats'ìi naxandá xi t̄jín isò'nde
 koni jngoò x̄it̄a xi yá k̄icha kjiya tsja nga k̄inè-l̄a
 kjo'in x̄it̄a xi mìkìl 'nchréñjon-l̄a. Tanga jè ki'ndí-l̄a
 chjoón, kitjá'an-l̄a; yaá k̄iiko ñánda t̄jna Nainá nga
 tíhotixoma. ⁶ Jè chjoón, tsanga-né. Ján k̄i ì'nde
 it'aà xìn ñánda nangui kixì choòn, ñánda nga Nainá

tsibíjnandaà jngoò-la i'nde nga ya katjiì-la tsojmì xi skine. Jngoò jmiì kò jò sìndò kò jàn-kaàn nàchrjein kíjna.

⁷ Xi jye komà iskan, ján ngajmiì kis'e kjojchán. Jè àkjale Miguel kò àkjale-la kiskaàn-kjoòkò jè ye je. Kò jè ye je, kò àkjale-la nas'ín 'nó kiskaàn-kjoò, ⁸ tanga mìkiì kisìkijne-la, kò mì tì mé i'nde kis'e-la ján ngajmiì. ⁹ K'oaá s'ín komà nga itjokàjiìn ngajmiì jè ye jchínga xi 'mì Xita Neí kò xi 'mì Satanás xi konachan-la ngats'iì xita isò'nde. Kinìkatjengui ya it'aà nangui kò àkjale-la.

¹⁰ Ki'nchrè jngoò-la jta ján ngajmiì xi 'nó kiìchja xi tsò:

—I'nde jyeé ijchò nàchrjein nga kitjokàjiìn kjo'in xita xinguiáá nga kò nga'nó-la Nainá nga jè kotìxoma kò kjetìxoma xi tjín-la Cristo [xi Nainá xó kisìkasén-ne], koií kjoa-la nga jye kànikatjengui jè xi kò nàchrjein kò nitjen tsját'in 'én ndiso xita xinguiáá nga nguixkon Nainá. ¹¹ Jñà xita xinguiáá, nga nguì koó nga'nó xi tjín-la jní xi tsibíxteèn jè Orrè kisìkijne-la kò nguì koó jñà 'én xi kitsjaà it'aà ts'e Nainá. Mìkiì kitsakjòn-la nas'ín kinik'en. ¹² Tsja kàtas'e-la ngajmiì kò jñà xi ya tìtsajna. Tanga imà xó-nò jñò xi ya tìtsajnaà it'aà nangui kò xi tìtsajnaà ya ijiìn ndáchikon nga jè xita neí jyeé ijchòjen-tjingui-nò kò 'nó jti tjín-la nga jyeé tíjiìn-la nga ta chiba nàchrjein kíjna-isa.

¹³ Jè ye xi 'nó je kji, k'e nga kinìkatjengui it'aà nangui, tsangatjingui-la jè chjoón xi tsi'beé ki'ndí x'in. ¹⁴ Tanga jè chjoón, jò jngaá ts'e ja kits'iì-la xi 'nó iì kjoàn mé-ne koma tótjen-ne nga kongala jè ye xi je kji. Ján kiì kíjna ya i'nde it'aà xìn

ñánda nangui kixì choòn. Jàn nó osen kína nga kòkinda nga tjoé-la tsojmì xi skìne. ¹⁵ Jè ye xi je kji, tsachrje nandá tso'ba nga ndána koma mé-ne nga koma kichrjoako-ne jè chjoón. ¹⁶ Tanga jè nangui kisichját'aà-la jè chjoón; kitáx'a, kits'iì ndána xi jè ye tsachrje tso'ba. ¹⁷ Jè ye ìsáá 'ńó kjòjtikeè jè chjoón. Kìi tjingui kondra-la jña xita tje-la chjoón nga kùkjaán-kò jña xi síkitasòn kjotíxoma-la Nainá kò jña xi ndaà tsjá 'én it'aà ts'e Cristo. ¹⁸ Jè ye, yaá tsibìjnajìin tso mì xi 'ncha ìndiì ndáchikon.

13

Jò cho ì xi ch'o kjoàn

¹ Kìjtseè jngoàà cho je xi ch'o kji xi itjo-mijìn-jìin-ne ndáchikon xi itoò ma skò; te ma nchrajá-la; jngoò corona ìtsé tíj'a nga ìjngoò ìjngoò nchrajá-la; jña skò tjít'aà 'ín xi Nainá chjajno-la. ² Jè cho je xi ch'o kji xi 'an kìjtseè, k'oaá kji koni kjoàn xa indo; k'oaá kjoàn ndsòkò koni ts'e cho oso; k'oaá kji tso'ba koni tso'ba xa. Jè nga'ńó xi tjín-la jè ye, kò jè ì'nde-la ñánda tíhotíxoma, kò jè kjotíxoma-la xi 'ńó tjín, jè cho ts'en kjòngatsja. ³ 'Nó tse kitìi jngoò skò jè cho je xi ch'o kji; k'oaá kji komà koni tsà jye kiyá; tanga jè skò xi 'ńó tse kitìi, kjòndaà-ne. Ngats'iì xita xi tjín nga tíjtsa ìsò'nde, tà kjòxkón-la kjoa xi komà, kò yaá kùtjingui-la jè cho ts'en. ⁴ Ngats'iì xita kìjtseèxkón jè ye, nga jè ye kitsjaà-la kjotíxoma xi tísíkeén jè cho ts'en. Jña xita tíkoaá kìjtseèxkón jè cho je xi ch'o kji. Ikjoàn kitsò:
—Tsjìn ìjngoò ìsa koni jè cho je xi ch'o kji; mì yá tjín xi kichìkjoa-la nga skaàn-kò.

5 Jè chò ts'en kitjò'ndeé-la nga kiichja 'én xi 'nga síkíjna yijo-la nga chjajno-la Nainá. Tikoáá kits'iì'nde-la nga ichán jò sá kotìxoma. 6 K'oaá s'ín kis'iìn; kiichjajno-la Nainá, kiichjajno-la 'ín-la Nainá kò Ni'ya Tsjeè-la, kò kiichjajno-la jñà xità xi títsajna ngajmiì. 7 Tikoá kitjò'ndeé-la nga kiskaàn-kò xità-la Nainá skanda kó nga kisìkijne-la. Ikjoàn kits'iì-la kjoìxoma it'aà ts'e ngats'iì tje-la xità, kò it'aà ts'e ngats'iì naxandá xi tjín, kò it'aà ts'e ngats'iì xità xi chja ngats'iì 'én xi tjín, kò it'aà ts'e xità xi tjín nga ìjngoò ìjngoò nangui xi tjín isò'nde. 8 Ngats'iì xità xi tjín nga títsa isò'nde, jè chò ts'en skoexkón, jñà ngats'iì xità xi mikiì jí't'aa 'ín-la nga tísa tàts'en-la kjoa, jè xojoñ xi ts'e kjoabinachon xi ts'e Orrè-la Nainá xi k'en ngajo-la xità.

9 Ndaà tiná'yaà koni xan-nò. 10 Jè xi ndayá kjis'en, k'oaá s'ín tjínè-la nga ndayá kjoì. Jè xi kichá ndojò kiyá-ne, k'oaá s'ín tjínè-la nga kichá ndojò kiyá-ne. Íí mochjeén nga kixi kitsajna kjit'aà kò nga kichikjoako-la kjo'in jñà xità-la Nainá.

11 Xi komà iskan kijtseè ìjngoàà chò je xi ch'o kji xi itjo mijìn-ne ijììn nangui. Jò ma nchrajá-la xi k'oa kjoàn koni nchrajá-la orrè. K'oaá s'ín chja koni jngoò ye xi 'ñó je kji. 12 K'oaá s'ín tjín-la kjoìxoma koni jè chò je xi ch'o kji xi tjína ítjòn nga ya síjna nguixkòn. Bínè-la xità xi tjín isò'nde nga kateèkkón jè chò je xi ch'o kji xi tjína ítjòn, jè xi kjòndaà-ne ñánda 'ñó tse kitii jngoò sko. 13 Tikoáá maá-la kis'iìn kjojkón xi 'ín tjín. Skanda maá-la kisìkjinchrobà-jen ni'ín xi ngajmiì nchrobá-ne skanda it'aà nangui nga nguixkòn xità. 14 Kiskoònachan-la xità xi tjín

isò'nde, koií kjoa-la jñà kjo_xkón xi kits'ii'nde-la nga kis'iin nguixkòn cho je xi ch'o kji xi tíjna ítjòn. Tsibít'in-la xítà nga kátindaà jngoò xkósòn-la jè cho xi tíjna ítjòn xi kichà ndojò kitii-ne skò tanga jaáya-la. ¹⁵ Jè cho xi ma-ne jò kits'ii-la nga'ño nga kisikínakon jè xkósòn-la cho xi kisindaà, mé-ne nga koma kichjá-ne kò ngats'ii xítà xi mìkiì sko_xkón siik'en-ne. ¹⁶ K'oaá s'ín tsibínè-la nga kàtasit'aà chiba-la jñà xi xítà ixti, jñà xítà jchínga, jñà xítà nchiná kò jñà xítà ima, jñà xítà xi títsajnandejí kò xi ch'i'nda títsajna'ño. Yaá kàtasit'aà chiba-la ya tsja kixi kò tsà ya ítjòn tjen-la. ¹⁷ Nijngoò xítà xi ma kotse tsojmi, nijngoò xi ma kotijna tsà mìkiì tjít'aà chiba-la kò tsà jè 'ín-la cho mìkiì tjít'aà-la kò tsà mìkiì tjít'aà-la número ts'e 'ín-la cho. ¹⁸ Ijndé mochjeén kjoachjine-la xítà; jè xi ndaà machiya-la, kátixkeya número-la cho je xi ch'o kji; ts'e xítà-né. Jè número: joòn sìndò kò jàn kaàn kò joòn.

14

Jè Orrè-la Nainá kò jñà xítà xi jngoò sìndò kò ichán ñijòn jmiì ma-ne

¹ Xi komà iskan, kiskoòtsejèn, kijtseè jè Orrè, nga síjnaxixi isòn nindoò Sión kò xítà xi jngoò sìndò kò ichán ñijòn jmiì ma-ne xi tjít'aà ítjòn tjen-la 'ín-la Orrè kò ts'e Na'èn-la. ² Ki'nchrè jngoò-la jta xi ngajmiì nchrobá-ne xi 'ño tíhone koni ma nandá k'e nga 'ño maje, koni ma nga faáya-la ch'on k'e nga jye ts'iin; k'oaá s'ín ki'nchrè-la koni tsà kjìn ma xítà xi síkjane ní'ño arpa. ³ Tína'ya jngoò-la sò xitse nga tíjnda nguixkòn jè xi tíjnasòn íxile nga tíhotíxoma,

ko ya nguixkon xi ñijòn ma-ne xi títsajnakon ko ya nguixkon jñà xita jchínga. Niyá xi ma-la seè jè sò xi tíjnda, ta jñà-né xi jngoò sindo ko ichán ñijòn jmiì ma-ne, jñà xi jye itjokàjiìn kjo'in ya isò'nde. ⁴ Jñà xita koi, mìtsà íchjín tsibìtsajna_{ko}, ngui tsjeè kisìjchá yijo-la. Jñá-né xi fi tjingui-la Orrè nita ñánda-ne nga fi. Jñà-né xi itjokàjiìn ítjòn kjo'in ngats'iì it'aà ts'e xita xi tjín isò'nde, mé-ne nga koma kongatsja ítjòn-ne Nainá ko Orrè. ⁵ Nímé 'én ndiso kiichja, ko nímé jé tjín-la nga nguixkon Nainá.

Àkjale xi jàn ma-ne

⁶ Kijtseè ìjngoaà àkjale xi tsó'bajiìn isén nga tífiko 'én ndaà-la Nainá xi tjín nita mé nàchrjein-ne nga keènojmi-la jñá xita xi títsajna isò'nde, ngats'iì xita xi tjín nga ìjngoò ìjngoò nangui, ngats'iì tje-la xita, ngats'iì xita xi chja ngats'iì 'én xi tjín, ko ngats'iì xita xi tjín nga ngats'iì naxandá xi tjín isò'nde. ⁷ 'Ñó chja kitsò:

—Jchaxkón Nainá, jeya tikíjna; jye ijchò nàchrjein-la nga koìndaàjiìn. Jchaxkón jè xi tsibíndaà ngajmiì, xi tsibíndaà nangui, xi tsibíndaà ndáchikon ko ñánda tíbitjo nandá.

⁸ Ìjngoò àkjale kiichja xi kitsò:

—Jyeé kakaàngui, jyeé kakaàngui Babilonia, naxandá xi 'ñó je kji, jè xi bít'in-la naxandá xi tjín isò'nde nga [k'jeíj nainá fit'aà-la] koni s'ín xita k'e nga kjoachijngui s'ín. Koni s'ín kis'iìn, k'oaá ngaya-la koni tsà kisìch'i yije xita isò'nde jè xán ts'e kjoachijngui-la xi tjiko kjojtì-la Nainá.

⁹ Ìjngoò àkjale tsatsejèn xi ma-ne jàn xi 'ñó chja nga kitsò:

—Tsà yá xi skoexkón jè chọ je xi ch'o kji kọ isén xkósòn-là, tsà tikoà sít'aà chiba-là itjòn tjen-là, o tsà tsja, ¹⁰ Nainá tsjá-là kjo'in, k'oaá ngaya-là koni tsà vino skoí xi tjikọ kjoajti-là Nainá. Nga jè sobà Nainá jyeé tsibíndaà jngoò chitsín vino xi 'ńó kjaán mé-ne nga kọkò-ne kjoajti-là nga s'e-là kjo'in ijììn ni'ín azufre xi 'ńó tsjè títi. Tíkotsejèn àkjale tsjeè kọ Orrè. ¹¹ Jè nì'ndi-là ts'e kjo'in-là, kjit'aá nàchrjein nita kjé-ne nga kitjomijìn. Mikiì sùkjáya kọ nàchrjein kọ nitjen jña xita xi jè chọ ts'en kọ isén xkósòn-là beèxkón, jña xi tikoà tít'aà chiba-là kọ 'ín-là jè chọ je xi ch'o kji. ¹² Íjndé nga mochjeén nga kàtachíkjoa-là nita mé kjoa-ne jña xita-là Nainá xi síkitasòn kjoitixoma-là kọ xi ndaà mokjeiín-là it'aà ts'e Jesús.

¹³ Ki'nchrè ìjngoàà 'én xi ngajmìi inchrobà-ne xi kitsò-na:

—Chjí, tít'eii xojoñ: “Jña nàchrjein xi fi-isa, mé tà ndaà-là jña xita xi kiyá nga mokjeiín-là it'aà ts'e Nà'èn-ná.” K'oaá tsò Inima Tsjeè-là Nainá: “Kixijí kjoa, jña xita koi sùkjáya-né kjoa ts'e xá-là; ján ngajmìi, jchaá-là ngats'ii kjoa xi ndaà kis'iìn.”

K'e nga maxkó tsojmì xi jye kòjchá ya it'aà nangui

¹⁴ K'e nga kiskoòtsejèn, kijtseè jngoàà ifi xi chroba kji, ya isò'nga ifi tíjna jngoò xi k'oa kji koni ki'ndí-là xita. Jngoò corona xi nguì oro tít'a sko, kọ jngoò kicha libá kjiya tsja xi 'ńó yijò kji. ¹⁵ Ìjngoò àkjale itjo ya i'nde tsjeè-là Nainá xi 'ńó chja, kitsò-la jè xi tíjnasòn ifi:

—Tits'ii nga tixákoji kicha libá-lè; tichásòìn, kọ tíxkoí kóhotjín tsojmì tjè xi tjin it'aà nangui nga

jye kòjchá yije; ko jyeé ijchò nàchrjein-la nga sincháxkó.

¹⁶ Jè xi tíjnasòn ifi, tsibíts'ia_ko k_ich_a libá-la ya isòn nangui nga tsatesòn tsojmì tjè-la isò'nde, ikjoàn chincháxkó.

¹⁷ Ijngòè àkjale itjo ya i'nde tsjeè-la Nainá xi kijna ngajmì xi tiko_a k_ich_a libá kjiya tsja xi 'ñó yijò kji.

¹⁸ Ijngòè àkjale itjo-ne it'aà ímix_a tsjeè-la Nainá, jè xi síkind_a ni'ín. 'Ñó kiichja-la jè àkjale xi k_ich_a libá kjiya tsja; kitsò-la:

—Tits'ii nga tixáko_i k_ich_a libá-lè xi 'ñó yijò kji; tichát'eì 'én-la jñà toò uva xi tjín it'aà nangui, nga jñà toò-la jye kichji.

¹⁹ Jè àkjale tsibíts'ia_ko k_ich_a libá-la nga tsatet'aà toò-la jñà yá uva; ikjoàn kisìkatsjo_oya ya ñánda nga ma binchanè toò uva. Kjo_a koi, jè okó kjoajti-la Nainá. ²⁰ Mìtsà ya jjiìn naxandá kisinè jñà toò uva; ján indii naxandá kisinè; k'e nga jye kisinè, jní itjo ñánda nga kisinè; 'ñó tse jní itjo skanda ijchò kangui-la kó kji 'nga tíjna freno xi tjí'a tso'ba kohòyo ko jàn sindo kilómetro tsangasòn.

15

Itoò ma àkjale xi itoò kjo'in j'ìko

¹ Ijngòè kjo_xkón kijtseè ján ngajmì xi 'ñó xkón kji ko 'ñó jeya ki'ya-la. Itoò ma àkjale xi itoò kjo'in j'ìko jñà kjo'in xi fehet'aà-ne nga yaá fehet'aà-ne kjoajti-la Nainá.

² Tiko_a kijtseè jngoàà ndáchikon xi chitsín kji; tsjájiìn ko ni'ín. Ya ncha kixi isòn ndáchikon xi chitsín kji, jñà xit_a xi jye kisìkijne it'aà ts'e cho je xi ch'o kji ko isén xkósòn-la, jñà xi mìkìl kitsjá'nde nga

kisit'aà ch̄iba-l̄a, k̄o número ts'e 'ín-l̄a. X̄ita koi k̄jiya tsja ní'ño arpa xi Nainá kitsjaà-l̄a. ³ Nchiseè sò-l̄a Moisés xi ch̄i'nda-l̄a Nainá k̄o sò-l̄a Orrè, nchitsò: Na'èn xi Nainá 'mì-lè, xi ta j̄i ta j̄ngoò-né xi 'ño tse nga'ño t̄jín-lè,

'ño jeya k̄o 'ño xkón t̄jín ngats'iì kjoa xi 'nì.

X̄ita kixi-né; kixií t̄jín ndiyá-lè.

J̄íí-né xi X̄itaxá Ítjòn t̄jina-l̄a ngats'iì naxandá xi t̄jín isò'nde.

⁴ ¿Yá xi mìkì tsakjón-lè Na'èn?

¿Yá xi mìkì skoexkón-lè?

Tajngoò ngaji xi x̄ita tsjì,

koií k'oas'ín kjoíí-ne ngats'iì naxandá-l̄a isò'nde nga skoexkón-lè

nga jye tí'ya-l̄a kjoa kixi-lè.

⁵ K'e nga jye k̄jtseè kjoa koi, kiskoòtsejèn nga kitáx'a ján ngajmì jè i'nde tsjeè-l̄a Nainá xi t̄jnaya j̄ya Ni'ya Nikje xi okó nga ya t̄jna Nainá. ⁶ Itjo ya i'nde tsjeè-l̄a Nainá j̄nà àkjale xi itoò ma-ne xi j'ìiko itoò kjo'in. Íkjá nikje lino chroba xi 'ño ote kjoàn; t̄kjá ndáyá-l̄a na'ño payo xi nguì oro. ⁷ J̄nà xi ñjòn ma-ne xi t̄tsajnakon, jngoò itjoiìn xi kisingsja nga íjngó íjngó àkjale xi itoò ma-ne; kitsjaà íjngó íjngó-l̄a ch̄itsín xi nguì oro xi ya t̄j̄ya kjo'in ts'e kjoajti-l̄a Nainá xi t̄jnakon n̄ita mé n̄achrjein-ne.

⁸ Ya j̄ya i'nde tsjeè-l̄a Nainá, kitseè n̄i'ndi xi ya inchrobà-ne it'aà ts'e kjoajeya-l̄a Nainá k̄o nga'ño xi t̄jín-l̄a. Niyá xi kitjò'nde-l̄a nga jahas'en ya i'nde tsjeè-l̄a Nainá skanda k'e nga jye tsitasòn yije j̄nà kjo'in xi itoò ma-ne xi j'ìiko j̄nà àkjale xi itoò ma-ne.

16

Chitsín xi itoò ma-ne

¹ Ki'nchrè jngoàà 'én xi ya itjo-ne i'nde tsjeè-la Nainá nga kitsò-la jñà àkjale xi itoò ma-ne:

—Tanguió, tíxteèn-sòn isò'nde jñà xi tjíya chitsín xi itoò ma-ne, kjo'in xi tjiko kjoajti-la Nainá.

² Kii jè àkjale xi tsako ítjòn-la. Tsibíxteèn-sòn isò'nde xi tjíya chitsín-la. Ngats'ìi xita xi tjín-la chiba-la cho ts'en ko xi beèxkón jè isén xkósòn-la jè cho je xi ch'o kji, tsako-la ch'in xajtsé xi 'ñó ch'o kjoàn ko ijò jchán ma.

³ Jè àkjale xi ma-ne jò tsibíxteèn-jiìn ndáchikon xi tjíya chitsín-la. Ko jè ndáchikon, nguì jní komà, koni tsá ya k'en-jiìn xita. Ngats'ìi xi titsajnakon ya jiìn ndáchikon jngoò k'aá k'en.

⁴ Jè àkjale xi ma-ne jàn, tsibíxteèn-jiìn ya xajngá nandá ko ñánda tíbitjo nandá, jè xi tjíya chitsín-la. Saà jní komà. ⁵ Ikjoàn ki'nchrè-la jè àkjale xi ts'e nandá, kitsò:

—Ngaji Na'èn, tjín-lè kjoakixi, nga k'oaá s'ín kits'ìi-la kjo'in jñà xita it'aà ts'e kjoa koi, nga jii xi xita tsjeè 'mì-lè, jii xi tijni skanda kjòtseé, tijni skanda i'nde. ⁶ Nga jñà xita koi tsibíxteèn jní-la xita-lè nga jñà kisik'en, ko xita xi kiichja-ngajo-lè. I'ndeì ngaji k'oaá tis'ín tì'biì ngajo-la jní nga nchi'biì; yaá chiba-la.

⁷ Tikoa ki'nchrè jngoò-la 'én xi ya it'aà ímixa tsjeè-la Nainá chja, nga tsò:

—Ji Na'èn xi Nainá 'mì-lè, xi ta ji ta jngoò-né xi 'ñó tse nga'ñó tjín-lè, kixíi kjoa, jñà kjo'in xi tí'biì-la xita koi, ndaá tjín ko nguì kixíi tjín.

⁸ Jè àkjalẹ xi ma-ne ñijòn, tsibíxteèn xi tjíya chĩtsín-là ya isòn ts'oi. Jè ts'oi kitjò'nde-là nga jè ndobá-là kisichjàn yijo-là xita. ⁹ Jè ndobá-là ts'oi 'ńó kisichjàn-là ngats'iì xita tanga jña xita koi mìkìl kisikájno jé-là ni mìkìl jeya kisikíjna Nainá; ta saá kiichjajno-là Nainá nga jè xi tjín-là nga'ńó it'aà ts'e kjo'in koi.

¹⁰ Jè àkjalẹ xi ma-ne 'òn, tsibíxteèn-sòn jè xi tjíya chĩtsín-là ya ñánda tíhotíxoma jè cho ts'en. Kọ jè i'nde ñánda tíhotíxoma jè cho je xi ch'o kji, kójñò-né. Jña xita xi beèxkón jè cho ts'en kiskinetjòn nijen-là nga 'ńó ijò komà-là. ¹¹ Tanga mìkìl kisikájno jé-là; tà saá isa ndaà kiichjajno-là Nainá xi ts'e ngajmìl, koi kjoa-là nga ijò komà yijo-là nga xajtsé tjín-là.

¹² Jè àkjalẹ xi ma-ne joòn tsibíxteèn-jìlìn xi tjíya chĩtsín-là ya xajngá nandá-je Éufrates. Jè nandá-là xajngá, kixiya-né, mé-ne nga koma kjoahato-ne jña xitaxá ítjòn xi nchrobá-ne ñánda bitjokàtji-ne ts'oi.

¹³ Kijtseè-ná nga jè ye xi 'ńó je kji, kọ jè cho je xi ch'o kji, kọ jè xita xi kiichjaya 'én ndiso nga itjo-ne tso'ba jàn inima ch'o xi cho xke kjoàn. ¹⁴ Jña-né inima ch'o-là neí xi s'ín kjoxkón; bitjo nga bíxkóya xitaxá ítjòn xi tjín nga tíjtsa isò'nde nga kjinchrobà kjojchán jè nachrjein xi jye tjíndaà-là Nainá xi ta jè tajngoó xi 'ńó tse nga'ńó tjín-là. ¹⁵ “Tiná'yaà, 'an, k'oaà s'ín kjoiaa koni s'ín f'iì xita chijé. Mé ta ndaà-là jè xita xi tjínndaà k'e nga 'an xi kjoiaa; kjijnandaà nikje-là nga kọkjá; mé-ne nga mìkìl kosobà-là nga tíjna laká.” ¹⁶ Jña inima cho-là neí tsibíxkóya xitaxá ítjòn-là isò'nde ya i'nde ñánda 'mì Armagedón xi 'én hebreo.

¹⁷ Jè àkjale xi ma-ne itoò, tsibíxteèn ijìin isén xi tjíya chitsín-la. Kìl'nchré-la 'én xi 'ñó kùichja xi ya inchrobà-ne i'nde tsjeè-la Nainá xi tíjna ngajmii ñánda tíjna jè xi tíjnasòn íxile nga tíhotíxoma; kitsò:

—Jyeé tsitasòn yije.

¹⁸ Ikjoàn jate ni'ín ch'on, kina'yà-la jta, kits'iin ch'on, ts'a ch'ón xi 'ñó jchán ts'a; ni saà jngoò k'a k'oas'ín 'ba kóni nga tisa tsatsejèn xita isò'nde.

¹⁹ Jè naxandá je xi 'ñó ndaà yaxkon-la, jàn ya komà. Kò jña naxandá xi chja-ne nga ìjngoò ìjngoò nangui xi tjin isò'nde, jngoò k'aá kichijà. Kò jè naxandá je xi 'mì Babilonia xi 'ñó ndaà yaxkon-la, mìkìl kisijchàajìin Nainá nga kitsjaà-la kjo'in, k'oaá ngayà-la koni kisik'iì jngoò chitsín xi tjíya vino xi ngui kjoajti-la Nainá xi jè jye tíjnandaà-la. ²⁰ Ngats'iì nangui xi tjin ijìin ndáchikon kò jña nindoò, jngoò k'aá kichijà, mì tì kii ki'ya-la. ²¹ Jña xita tsanè jtsí ndajo xi 'ñó tsiaàn kjoàn, tjin-la tsà ichán kilo nga jngoò ìjngoò. Jña xita, 'on kùichjajno-la Nainá, koií kjoa-la nga tse kjo'in kis'e-la kjoa ts'e jtsí ndajo.

17

Kós'ín s'e-la kjo'in jè chjoón chijngui

¹ J'iì jngoò jña àkjale xi itoò ma-ne xi itoò chitsín tjíya tsja, kùichja, kitsò-na:

—Nchroboí, kokoò-lè kjo'in xi tjoé-la jè chjoón chijngui xi 'ñó ndaà yaxkon-la xi tíjnandì ñánda nga kjìn xajngá nandá fahato. ² Jña xitaxá ítjòn xi tjin isò'nde, yaá tsafáhijtako chjoón jè nga kj'eíí nainá kijtseèxkón k'oaá ngayà-la tsà kjoa chijngui kisìkò jè chjoón. Kò ngats'iì xita xi tjin isò'nde, k'oaá

tì kis'iìn nga kj'eíj nainá kùttjngui-là k'oaá ngaya-là koni tsà xán ts'e kjoachijngui-là chjoón kjòch'i-ne.

³ It'aà ts'e Inima Tsjeè-là Nainá, jè àkjale kiiko inima-na jngoò i'nde it'aà xìn ñánda nangui kixì choòn. Kìjtseè jngoàà chjoón xi tíjnakjá-là chọ je xi ch'o kji xi inì kji. Yijàjno yije yijo-là 'én xi kondra ts'e Nainá nga chjajno-là. Itoò ma skọ kọ te ma nchrajá-là. ⁴ Jè chjoón, nikje skọ kọ nikje inì kjoàn xi íkjá. Yijàjno xi nguì oro kọ ndajo ote xi 'ñó ts'e chji-là, kọ ndátọn fangui xi 'ñó chjí-là xi 'mì perla. Tjiya tsja jngoò chítsín xi nguì oro; jè chítsín kitseé kjoa ch'o-là kọ kjoa tjé xi ts'e kjoa chijngui-là. ⁵ Ya itjòn tjen-là, tjít'aà 'én 'ma xi tsò: “Babilonia xi 'ñó je kji nga ndaà yaxkon-là, jè nea-là íchjín chijngui kọ ngats'ìi kjoa ch'o xi tjín isò'nde.” ⁶ K'e nga kiskoò'an chjoón jè, kìjtseè xkoaàn nga ch'i-né nga jní-là xita-là Nainá kits'ìi kọ ts'e xita xi kinìk'en nga 'én-là Jesús kiìchjaya. K'e nga kìjtseè tà kjòxkón-na. ⁷ Kitsò-na jè àkjale:

—¿Mé-ne maxkón-lè? 'Aán, kènojímí-lè kó tsòya-ne kjoa 'ma-là chjoón jè, kọ it'aà ts'e chọ je xi ch'o kji xi tíjnakjá-là xi itoò ma skọ koa te ma nchrajá-là. ⁸ Jè chọ xi kà'yi, tsibìjnakon-né, tanga i'ndeì tíjnak'en-né; yaá kjinchrobà mijìn-ne nítjan jñò mé-ne nga jngoò k'a chija-ne. Jñà xita xi tjín isò'nde, xi mìkiì tjít'aà 'ín-là xojon ts'e kjoabinachon kóni nga tisa kisindaà isò'nde, tà koxkón-là k'e nga skoexkon jè chọ xi tsibìjnakon, kọ i'ndeì tíjnak'en-né, tanga kotsején ijngoò k'a-ne.

⁹ 'Íjndé mochjeén kjohítsjeèn xi tjín-là kjoa chjine. Jñà skọ chọ xi itoò ma-ne, jñà ngaya-là jñà nindoò xi itoò ma-ne ñánda tíjnanè jè chjoón.

Tíkooá jñà ngaya-la xi itoò ma-ne xitaxá ítjòn. ¹⁰ Òn ma-ne xi jye k'en, jngoò ma xi tíhotíxoma-isa, ko jè xi ìjngoò, kj'eè kiì f'ìi. Tanga k'e nga kjoíí, tà chibaá nàchrjein kotíxoma. ¹¹ Jè cho je xi ch'o kji xi tsibìjnakon tanga ì'ndeì tíjnak'en-né, jè xi ma-ne jìin xitaxá ítjòn. Yaá tíjnajìin-la xi itoò ma-ne, ko yaá tífi ñánda nga jngoò k'a jchija.

¹² Jñà nchrajá xi te ma-ne xi kà'yi, jñà ngaya-la xitaxá ítjòn xi te ma-ne xi kj'eè kiì tjoé-la kjotíxoma. Tanga k'e nga tjoé-la kjotíxoma ta jngoò hora kotíxomakjoò ko jè cho je xi ch'o kji. ¹³ Jñà xitaxá ítjòn xi te ma-ne, tajngoó kjohítsjeèn tíjín-la nga jè cho je xi ch'o kji sìngatsja nga ñó-la ko kjotíxoma-la. ¹⁴ Ikjoàn skaàn-ko jè Orrè, tanga jè Orrè sìikijne-né. Nga jè-né xi otíxoma-la jñà xita xi otíxoma, ko Xitaxá ítjòn-laá ma jñà xi xitaxá ítjòn títsajna. Jñà xita xi títsajnako, xó kinokjoà-la, xó kitjaajìin-ne, ko kixíí síkitasòn-la.

¹⁵ Jè àkjale k'oaá ti kitsò-na:

—Jè nandá xi kà'yi, ñánda tíjrandiì chjoón chingui, naxandá-né, xita kjín-né, jñá-né xita xi tíjín nga ìjngoò ìjngoò nangui xi tíjín isò'nde, koa jñá-né xita xi chja ngats'ìi 'én xi tíjín isò'nde. ¹⁶ Jñà nchrajá xi te ma-ne xi kà'yi, ko jè cho je xi ch'o kji xi kà'yi, sìjtikeè-né jè chjoón chingui, kjoaá'an yije-la skanda jñà nikje-la, sìikájna laká-né. Yijo-la skine-né. Ikjoàn yaá kokájìin ní'ín. ¹⁷ Nainá k'oaá s'ín tsibìjìin kjohítsjeèn-la jñà xita koi nga k'oas'ín sìikitasòn koni s'ín mejèn-la Nainá. Jè kjotíxoma xi tíjín-la xita koi tíjngoò ikon nga jè cho ts'en kongatsja, skanda k'e nga kitasòn yije 'én xi kiìchja

Nainá. ¹⁸ Jè chjoón xi kà'yi, jè-né naxandá je xi otíxoma-la jñà xitaxá ítjòn xi tjín isò'nde.

18

Kós'in kiskaàngui jè naxandá Babilonia

¹ Xi jye komà iskan, ijngoò àkjale kijtseè xi tínchrobájen-ne ngajmii, xi 'ñó tse nga'ño tjín-la. Jè kjoa jeya-la xi 'ño ote kji, kisihiseèn-sòn nangui.

² 'Ñó kùichja, kitsò:

—Jye kiskaàngui, jye kiskaàngui naxandá je Babilonia. Jyeé ta i'nde-la inima ch'o-la neii komà, ya ñánda kitseè yije inima tjé xi ch'o kjoàn. Kò ya títsajna nise xi ch'o kjoàn xi mìkii ma chine.

³ Ngats'ii xita isò'nde, k'oaá ti kis'iin koni s'in xita naxandá jè nga kjeii nainá kiitjinguila, k'oaá ngaya-la koni tsà kjòch'i-ne jñà kjoachijngui xi kis'iin. Jñà xitaxá ítjòn-la xi tjín nga títsa isò'nde, k'oaá ti kis'iin. Kò jñà xita isò'nde xi tsojmì otseya nga s'in kjohima, kjònchiná-né xi kjoa ts'e kjotsja-la yijo-la koni s'in jñà xita xi tjín naxandá jè.

⁴ Ijngoò 'én ki'nchrè xi ngajmii inchrobà-ne, xi kitsò:

—Jñò xi naxandá ts'an xan-nò, tìtjokàjñò naxandá jè, mé-ne nga mì ya kòkòt'aà-nò jé-la, tikoá mìkii kòkòt'aà-nò kjo'in xi s'e-la. ⁵ Jñà jé-la, jyeé tímakjìn, jyeé j'ii skanda i ngajmii. Nainá, mìkii siijchàajìin [nga tsjá-la kjo'in] xi kjoa ts'e jé-la. ⁶ K'oaá tis'in kàtamatin ngajo-ne koni s'in kis'iin jè. Jò k'a k'oa tis'in kàtamatin ngajo-ne koni tjín kjoa xi kis'iin. Jè chitsín xi kisikáyajìin vino, kòkji tikajìin ngajo-là nga jò k'a isa jchá kàtama, [jò k'a okji kjo'in kàtako-la]. ⁷ Jè kjoa-la nga jeya

kisikíjna yijo-là kò nga 'ńó kis'e-la kjotsja, k'oa tís'in tjiì ngajo-là kjo'in nga kàtakjindáya. Nga k'oaá tsò iníma-là: “An, k'oaá s'in tijnà nga chjoón sko-là 'mì-na. 'An mìtsà chjoón ka'an 'mì-na, tìkoaá mìkii siikjiaán kjo'in nita kjé-ne.” ⁸ Koií kjoa-là nga tajngoò nachrjein kitjojenè-là kjo'in: Kiyá xita-là. Tìkoaá skindàya-né. S'ée-là kjoa ts'e kjinchrá. Ni'in kitì-ne nga kjoehesòn. Nga 'ńó tse nga'ńó tjin-là jè Nainá xi otíxoma nga k'oaá s'in jye kiskoòsòn-la nga tsjá-là kjo'in.

⁹ Jñà xitaxá ítjòn-là isò'nde 'ńó skindáyakeè kò 'ńó 'on koma-là k'e nga skoe nga tíbitjo ni'ndi-là nga títi jè naxandá jè ya ñánda kiìtjingui-là xi kj'ejí nainá k'oaá ngaya-là koni tsà jngoó chjoón chijngui kiìtjingui-là nga kisìtsjako yijo-là. ¹⁰ Kjiín kìncha-ne nga skótsejèn-là, nga tsakjón-là kjo'in-là. 'Nó kichja, kitso:

—Ima xó-ne, ima xó-ne naxandá je Babilonia xi 'ńó kis'e-la nga'ńó; tajngoò tjò kòf'ì-là kjo'in.

¹¹ Jñà xita xi otijnaya tsojmì xi tjin isò'nde, tìkoaá skindáyakeè-né nga 'on koma-là iníma-là nga mì tì yá xi kotse-ne tsojmì xi otijnaya, ¹² tsojmì xi ts'e tòn oro, plata, ndajo chjí xi 'ńó ndaà kjoàn, ndátòn chjí xi 'ńó ndaà kjoàn; nikje lino xi 'ńó chjí, kò nikje seda, nikje sko kò xi inì kjoàn; ngats'ì yá xi 'ńó ndaà jne, tsojmì chjí xi nindaà ni'ńo cho kisindaà-ne, ngats'ì tsojmì xi yá xi 'ńó chjí xi yá ikon, kò kichà bronze, kò kichà xi 'mì hierro, kò ndajo marmol, ¹³ kò chrjoayá canela, ngats'ì tsojmì xi ndaà jne, chrjongó-là Nainá, kò xkiì jne xi 'mì mirra, kò chrjongó ts'e yá olivo, kò vino kò asiti. Trigo kò skoan inchrajín, kò cho ch'á,

orrè, kohòyo, carreta, kò xitá chì'nda nga kisatíjna.
 14 Kitsò-la jè naxandá:

—Ngats'ìi kjoa xi ndaà kisaseèn-la inima-lè, jyeé kitjaàxìn yije-lè. Kjoa nchiná-lè jyeé kichijà. Kò kjoa xi ndaà kòtsjachi, mì ti kii sakò-lè nita kjé-ne.

15 Jñà xitá xi otíjnaya tsojmì xi ya kjònchiná ts'e naxandá jè, kjiín kìnchat'aàxìn nga tsakjón-la kjo'in. Skindáyakeè koa 'ñó 'on koma-la inima-la.

16 K'oaá kitsò:

—Ima xó-ne naxandá xi 'ñó je kji, xi nikje lino chjí tsakakjá kò nikje xi sko kjoàn kò xi inì kjoàn. Yijàjno yijo-la oro, ndátòn chjí xi 'mì perla kò ndajò chjí xi 'ñó ndaà kjoàn. 17 Tajngoò tjò kachija yije kjoa nchiná xi tjín-la.

Ngats'ìi xitá xi síxáko chitso, kò ngats'ìi xitá xi ya chitso títsaya nga nchifi, jñà xi ya iya chitso síxá kò ngats'ìi xi síxájiin ndáchikon, kjiín tsibìtsajna 18 k'e nga kijtseè nì'ndi-la naxandá nga títi; 'ñó kiichja, kitsò:

—Nì saá jngoò naxandá tjín xi mangásòn-kjoò koni kji naxandá jè, nga 'ñó ndaà kiyaxkon-la.

19 Ikjoàn tsibíxteèn-jno chijo sko, 'ñó kiskindáyakeè nga 'on komà-la inima-la; kitsò:

—Ima xó-ne naxandá xi 'ñó je kji; jè kjoa nchiná-la, ndaà kjònchiná-ne jñà xitá xi tjín-la chitso ya ijiiin ndáchikon. Kò i'ndeì, ta jngoó tjò kachija yije kjoa nchiná-la.

20 Ngats'ioò jñò xi titsajnaà ngajmiì, tsjaá t'è-là takòn. Jñò xi xitá-la Nainá maà, jñò xi tsibíxáya-nò Cristo, kò jñò xi Nainá nokjoà ngajo-là, tsja t'è-là inima-nò. Nainá jyeé kàtsjá-la kjo'in naxandá jè koií kjoa-la nga ch'o kisìko-nò.

²¹ Jngoò àkjale xi 'ñó tse nga'ñó tjín-la kiskoé jngoò ndajo xi koni kji ndajo natsí kji, kisikatjen-jìin ndáchikon, kitsò:

—Jè naxandá Babilonia, xi 'ñó je kji, k'oaá s'ín skajiin-ndá; jngoó k'aá chija nita kjé-ne, mì tì yá xi skoexkon-ne. ²² Mì tì kii kina'ya-la inchò calle-la jña música xi síkjane arpa, jña xi síkjindáya xobí, kò xi síkjane chrjo trompeta. Mì tì kii s'e-la xita xi síxá nita mé xá-ne. Tikoá mì tì kii koxáko-ne molino ts'e ncheé. ²³ Ni'ín ts'e lámpara, mì tì kii sijniseèn-ne; mì tì kii s'e-ne s'eí nga kixan xita; koií kjoa-la kòs'ín komat'in-ne nga jña xita-la xi otseya kò otíjnaya tsojmì, 'ñó xita nchiná komà i isò'nde; tikoá kiskoðnachan yije-la naxandá xi tjín isò'nde nga komà-la kis'iin kjoatj'e. ²⁴ Naxandá jè, Nainá kitsjaà-la kjo'in nga jé ts'e-né nga kinik'en xita-la Nainá kò xita xi kiichjaya ngajo-la Nainá kò ngats'iì xita xi kinik'en nga tíjtsa isò'nde.

19

Xita xi tsjá-la kjondaà Nainá ján ngajmì

¹ Xi jye komà iskan, ki'nchrè-la ján ngajmì 'én koni kjín jchán ma xita xi chja nga tsò:

¡Aleluya! ¡Nga tikíjna Nainá!

Nga jè ochrjekàjìin-ná kjo'in kjoa ts'e jé-ná,

kò ta jè tajngoò xi tjín-la kjoajeya

kò xi tse nga'ñó tjín-la.

² Nga jè Nainá, ndaà s'ín kò kixí s'ín

k'e nga tsjá-la kjo'in xita;

nga jyeé kitsjaà-la kjo'in jè naxandá je Babilonia

xi kisikits'ón-jìin isò'nde nga tsakó-la xita isò'nde

nga kj'eí nainá kijtseèkón

k'oaá ngaya-la koni jngoò chjoón xi kjoa chijngui s'ín.

Koií jé xi komà-la nga jè kisìk'en xita chi'nda-la Nainá xi kiùchja ngajo-la.

³ Jjngoò k'a k'oa kitsò:

—¡Aleluya! ¡'Nga tìkíjna Nainá! Jè nì'ndi-la jè naxandá nga títi, k'oaá s'ín kitjomijìn nita mé naxrjein-ne.

⁴ Jñà xita jchínga xi kaàn ñijòn ma-ne ko xi ñijòn ma-ne xi tútsajnakon, chincha-xkó'nchi-ñiat'aà-la nga kijtseèxkón Nainá xi tíjnasòn íxile ñánda tíhotíxoma. Kitsò:

—¡K'oas'ín kàtama! 'Nga tìkíjna Nainá. ¡Aleluya!

⁵ Ya íxile-la ñánda tíhotíxoma, kina'yà-la 'én xi kitsò:

Tji-là kjondaà Nainá ngats'ioò jñò xi chi'nda maà, jñò xi ixti maà ko xita jchínga, ngats'ioò xi tsakjoòn-chaà Nainá.

⁶ Ki'nchrè-la 'én koni tsà kjin jchán ma xita xi chja, koni s'ín na'yà-la nandá k'e nga one, koni s'ín na'yà-la k'e nga one ch'on, xi kitsò:

¡Aleluya!

¡'Nga tìkíjna Nainá xi ta jè tajngoó xi 'ñó tse nga'ñó tjin-la!

Nga jyeé jè tíhotíxoma.

⁷ Tsja k'óé-lá inima-ná, sìtsja-chaá takoán, jeya sikíjnaá Nainá,

nga jyeé j'ì kjoa bixan-la Orrè;

chjoón-la jyeé tíjnandaà.

⁸ Jè chjoón, jye ko'bi-là nikje lino xi 'ñó chjí,

xi 'ñó tsjeè kjoàn tikoá 'ñó ote nga kónakjá.

Jè nikje lino xi 'ñó chjí, jè ngaya-la kjoakixi xi s'ín xita-la Nainá.

⁹ Jè àkjale kitsò-na:

—Chjí kjoa koi: “Mé ta ndaà-la jñà xita xi xó kinokjoà-la kjoa bixan-la Orrè nga jè kokjen-ko.”

Kitsò isa:

—Jñà 'én koi, nguì 'én kixi-la Nainá-né.

¹⁰ Tsohósijna xkó'nchiñia it'aà ndsoko jè àkjale nga mejèn-na skoexkoán. Tanga jè àkjale kitsò-na:

—Kì k'oaá 'ni; 'an, tikoáa chí'nda-la Nainá ma koni ngaji ko jñà 'ndsì xi ndaà fì tjingui-la jñà 'én kixi xi kiichja Jesús. Jè Nainá chaxkoín.

Jñà 'én kixi xi kiichja Jesús, tijñà-ne xi síkítsejèn-ya-la xita xi chja ngajo-la Nainá.

Jè xi tíjnasòn-la kohòyo chroba

¹¹ Kìjtseè ngajmii nga tix'á; tsatsejèn jngoò kohòyo xi chroba kji. Jè xita xi tíjnakjá-la, k'oaá s'ín yaxkon-la nga kixi síkitasòn ko kixi tíjna, koií kjoa-la nga nguì ko kjoakixi-la bíndaajin ko nga kjaán-kjoò. ¹² Jñà xkon, k'oaá kjoàn koni ni'ín. Ya sko, kjín corona jtobá tí'a ko jngoò 'ín-la tíjt'aà xi mìkii yá xi machiya-la kó tsòya-ne; tajngoò jè machiya-la kó tsòya-ne. ¹³ Jè nikje xi kinakjá, jní yijàjno. Jè 'ín-la, 'Én-la Nainá 'mì. ¹⁴ Yaá tjingui-la jñà soldado ts'e ngajmii nga títsajnakjá-la kohòyo chroba; saà nikje lino chrobaá íkjá xi 'ñó chíj ko tsjeè kjoàn. ¹⁵ Jè tso'ba bitjo jngoò kichà ndojò xi 'ñó yijò kji, jè xi síki'on-ne ngats'iì naxandá. Nga jè kotixoma-la xita naxandá. Jè yá nise sijkjeén xi nguì kichà tájaà. Jè sobá kosinè jñà toò uva ya iya chitso nga kochrje vino xi okó kjoajti-la Nainá xi ta jè tajngoó xi 'ñó tse nga'ñó tjín-la. ¹⁶ Jè nikje-la ko chrjomí-la tíjt'aà 'ín xi tsò: “Xitaxá Ítjòn-la ngats'iì

jñà xi xitaxá ítjòn títsajna kò jè-né xi otíxoma-la ngats'ì jñà xità xi otíxoma.”

¹⁷ Kijtseè jngoàà àkjalé xi ya síjnasòn-la ts'oi; 'ñó chja-la ngats'ì cho xi tíjmajìl isén xi yijo kine. Tsò:

—Nchrobá, tixkóyaà xinguiò mé-ne nga chjineé yijo xi Nainá tsjá-nò, ¹⁸ nga chjineé yijo-la xitaxá ítjòn, kò yijo-la xità sko-la soldado, yijo-la xità ts'en, yijo-la kohòyo kò yijo-la xità xi titsakjá-la kohòyo, yijo-la ngats'ì xità xi títsajnandeí kò xità ch'nda kò xi ixti kò xità jchínga.

¹⁹ Kijtseè jè cho je xi ch'o kji kò jñà xitaxá ítjòn ts'e isò'nde kò xità soldado-la; jyeé títsajnandaà nga skaàn-kò jè xi tíjnakjá-la kohòyo chroba kò jñà soldado-la. ²⁰ Jè cho je xi ch'o kji kindob'à'ño; tíkoà kindob'à'ño jè xi 'én ndiso kùchja xi kis'ìl kjojkón nga nguixkòn jè cho. K'oaá s'ín komà-ne nga kiskoònachàn-la jñà xità xi kiskoé chiba-la tíkoà kijtseèxkón isén xkósòn-la jè cho. Ingajò kinìkatsjoòjìl tíkòn jìl nì'ín xi tíjnga ñánda tíl kò azufre. ²¹ Jñà xità xi i'nga, jè kisik'en-ne jè kichà ndojò xi bitjo tso'ba jè xi tíjnakjá-la kohòyo. Ngats'ì cho xi tíjmajìl isén, jñà kjòskiì-ne nga kiskine yijo-la xità xi jye k'en.

20

Jè xi jngoò jmii nó

¹ Kijtseè jngoàà àkjalé xi tínchrobájen-ne ngajmii. 'Ya ibi ts'e nítjan jñò. Kjiya tsja jngoò na'ño kichà cadena xi 'ño je kji. ² Jè àkjalé kitsobà'ño jè yè jchínga xi tíjè-ne xi 'mì Xità Neí kò xi Sathanás. Jngoò jmii nó tsibít'aà'ño. ³ Kisìkatjen-s'en ya nítjan jñò; tsibíchjoà'ño-la jè xotjoa; ikjoàn

tsasíjna-la selo mé-ne nga mì yá skíx'a-ne jè xotjoa nítjan. Yaá tsasíjnahiya mé-ne nga mì tì kii koma skónachan-la xita isò'nde, skanda k'e nga kjoehet'aà xi jngoò jmiì nó. Xi koma iskan tjánda'ño ìjngoò k'a-ne nga koma kojmeèndeí chiba nachrjein isa.

⁴ Kijtseè íxile ts'e kjotíxoma; títsajnasòn jña xita xi kitjoé-la kjotíxoma nga jña koìndaàjìin. Tíkoa kijtseè inima-la jña xita xi kitiís'ìin, nga koi kjoa-la 'én kixi xi kitsjaà it'aà ts'e Jesús ko nga 'én-la Nainá kiichjaya. Jña xita koi, mìkì kijtseèxkón jè cho je xi ch'o kji ko isén xkósòn-la; tìkoa mìkì kisit'aà chiba-la itjòn tjen-la ko tsja. Xita koi, ìjngoò k'a tsibítsajnakon; jngoò jmiì nó tsatíxoma ko Cristo.

⁵ Jña xita koi xi jaáya ítjòn-la. Tanga jña mik'en xi i'nga, skanda k'ée jaáya-la nga ijchò jngoò jmiì nó.

⁶ Mé ta ndaà-la jña xi koko-la nga kjoaáya ítjòn-la; xita koi, jyeé xita-la Nainá koma; jè kjoa biyaa xi ma-ne jò, nímé nga'ño tjín-la it'aà ts'e xita koi; mì tì mé ma sùko-ne. Tà saá no'miì-la Nainá koma ko ts'e Cristo. Jngoò jmiì nó kotíxomako.

⁷ K'e nga kjoehet'aà xi jngoò jmiì nó, tjánda'ño ìjngoò k'a-ne jè Satanás ya ñánda tíjnahiya nítjan jño. ⁸ Kijtjondeí-ne nga skónachan-la xita naxandá xi tjín nga tíjtsa isò'nde, jè Gog ko Magog. Kojìxkóya xita mé-ne nga koìts'ia-ne kjojchán. Kjín jchán koma xita, k'oaá ngaya-la koni tsomì xi jncha indii ndáchikon. ⁹ Chinchimasòn kóhokji isò'nde; chinchandii-la nga jngoò itjandii ñánda títsajna xita-la Nainá ko naxandá xi tsjakeè. Ikjoàn kisikasén ni'ín Nainá xi inchrobà-ne ngajmiì. Jngoò k'a tsaká kóhotjín. ¹⁰ Jè xita neí xi kiskoònachan-la xita, kinìkatjen-jìin ya ì'nde ñánda tíjnga ni'ín ko azufre.

Jyee ya títsajna jè chò je xi ch'o kji kò xi kiìchjaya 'én ndiso. Yaá sììkjeiín kjo'in kò nachrjein kò nítjen nítà kjé-ne.

Jè íxile ts'e kjotíxoma xi chroba kji

¹¹ Kìjtseè jngoò íxile xi chroba kji kò 'ñó je kji nga ya tíjnasòn jngoò xi tíhotíxoma. Nga nguixkòn jè xi tíjnasòn íxile, jngoò k'a kichijà nangui kò ngajmii. Nítà ñánda-ne, mì tì kiì ki'ya-la. ¹² Kìjtseè mik'en xi ìxti kjoàn kò xi xítà jchínga kjoàn, 'ncha kixi nguixkòn Nainá. Íkjoàn kitáx'a jña libro [ñánda tjit'aà mé xi kis'iìn nga jngó jngó xítà]; koa ìjngoò libro kitáx'a ñánda tjit'aà ts'e kjoabinachon. Jña mik'en, k'oaá s'ín kisindaàjiiìn-la koni s'ín tjit'aà xojon ts'e libro, mé kjoa xi kis'iìn. ¹³ Jè ndáchikon kitsjaà jña mik'en xi ya k'en-jiiìn. Jè kjoabiyaà kò i'nde kjo'in tìkooá kitsjaà mik'en xi ya títsajna. K'oaá s'ín kisindaàjiiìn-la nga jngoò ìjngoò xítà koni tjin kjoa xi kis'iìn. ¹⁴⁻¹⁵ Jè kjoabiyaà kò i'nde kjo'in kinìkatsjoòjiiìn ñánda títi ni'ín jnga. Kò jña mik'en xi mikì tjit'aà 'ín-la jè libro ts'e kjoabinachon, tìkooá yaá kinìkatsjoòjiiìn ñánda títi ni'ín jnga. Jè xi ma-ne jò kjoabiyaà.

21

Ngajmii xitse kò nangui xitse

¹ Kìjtseè jngoáá ngajmii xitse kò nangui xitse. Jè ngajmii xi kisijna ítjòn kò nangui xi kisijna ítjòn, jyeé kichijà; tìkooá kichijà jè ndáchikon. ² Tìkooa kìjtseè jè naxandá tsjeè xi Jerusalén xitse 'mì, nga tíinchrobájen ngajmii nga nguixkòn Nainá. K'oaá s'ín tíjnandaà koni jngoò chjoón xi ndaà bíndaà

yijo-la nga jye kixan-ko x'in-la. ³ Ki'nchrè-la 'én xi 'ńó chja, xi ngajmù inchròbà-ne, xi tsò:

—Chítsejèn-là Ni'ya Tsjeè-la Nainá, jyeé kòbitjojen; Nainá yaá kijnako jñà xita; xita naxandá-laá koma, nga jè sobà xi Nainá kitso-la. ⁴ Jè sobà Nainá sùxìjno yije ndáxkon; mì tì kù s'e-ne kjoabiyaà; mì tì kù s'e-ne kjoaba; mì tì kù yá skindàya-ne; mì tì kù s'e-ne xi ijòjno ijòt'aà yijo-la, koi kjoa-la nga jye tsato kjoa jchínga.

⁵ Jè xi tíjnasòn íxile ts'e kjotíxoma, kitsò:

—Chítsejèn-la, 'aán sùxítseyá yije tsojmì xi tjín.

Ikjoàn kitsò-na:

—Chjí, xojon tít'eì jñà 'én koi; nga nguì k'oaá s'ín tjín nga kitasòn; nguì 'én kixi-né.

⁶ Ikjoàn kitsò-na:

—Jyeé tsitasòn yije. 'An-ná xi tíjna ítjoàn skanda tàts'en-la kjoa kó nga skanda fehet'aà-ne. 'An-ná xi tsibìts'iaa ko xi sikjehet'aà-na kjoa. Ngats'ì xi xíndá-la, 'aán tsjaà kjotjò-la nandá xi tíbitjo ya i'nde ñánda mìkù xíya nandá mé-ne koma kijnakon-ne iníma-la nítá kjé-ne. ⁷ Jñà xi sùkijne, jñà skoé kjotjò ngats'ì kjondaà koi. 'Aán kótijnakoaa nga Nainá kitso-na ko jñà, ixti-naá koma. ⁸ Tanga jñà xita xi tsakjón, jñà xi mìkù mokjeín-la, jñà xi 'ńó ch'o s'ín, jñà xi xita sík'en, jñà xi kjoa chijngui s'ín, jñà xi xita tj'e, jñà xi xkósòn beèxkón, ngats'ì xi 'én ndiso chja, ján kixojìin ñánda títi ní'ín jnga ko azufre; jè xi ma-ne jò kjoabiyaà.

Naxandá xitse xi 'mì Jerusalén

⁹ J'ìikon jngoò-na àkjalé jñà xi itoò ma-ne, xi tíkoá itoò chít sín tjín-la, xi jncha kitseè xi itoò kjo'in xi fehet'aà-ne. Kitsò-na:

—Nchroboí, kokoò-lè jè xi koma chjoón-la Orrè.

¹⁰ It'aà ts'e Inima Tsjeè-la Nainá, jè àkjale kiiko inima-na jngoò nindoò xi je kji ko 'nga kji. Tsakó-na jè naxandá xi je kji, naxandá tsjeè Jerusalén nga tínchrobájen-ne ngajmiù nga nguixkon Nainá. ¹¹ Jè naxandá tsjeè Jerusalén, oteé tsejèn xi kjoa ts'e kjoajeya-la Nainá. K'oaá s'ín ote kji koni ndajo chí xi 'ño ndaà kjoàn, koni ndajo xi jaspe 'mì nga ote kji koni chítsín. ¹² Nga jngoò itjandiì, jè naxandá, chrjó ndajo tjindiì-la xi 'ño je kji ko 'ño 'nga kji. Tejò xotjoa tjín-la. Nga jngoò ìjngoò xotjoa, jngoò àkjale síjnajto. Tíkoa ya tíjt'aà 'ín-la nga tejò naxandá xi ya inchrobàt'aà-ne ixti-la Israel. ¹³ Ya kixi-la ñánda bitjokajìin-ne ts'oi, jàn xotjoa tjín-la, ya kixi-la ñánda kahatji-ne ts'oi, jàn xotjoa tjín-la. Ya norte, tíkoaá jàn xotjoa tjín-la, ya sur, tíkoaá jàn xotjoa tjín-la. ¹⁴ Jè chrjó ndajo xi tjindiì-la naxandá, tejò chrjó ndajo xi ya tíjt'aà nga tejò 'ín-la xita xi tejò ma-ne xi it'aà ts'e Orrè kisixáya-la.

¹⁵ Jè àkjale xi tíchjako-na, jngoò kicha kjinaya tsja xi nguì oro xi koni kji yá xi ma machiba-ne. Jè kisikjeén nga ma kisichiba naxandá ko xotjoa-la ko chrjó ndajo-la. ¹⁶ Jè naxandá k'oaá s'ín kijna nga ñijòn chrjangui tjín-la. Koni kji ndojò, k'oaá tí kji tiyà-ne. Jè àkjale, k'e nga kisichiba, jò jmiù ko jò sìndo kilómetro tjín-la. Ngàsòn chiba tjín-la nga ndojò ko nga tiyà ko nga 'nga. ¹⁷ Ikjoàn kisichiba jè chrjó ndajo. Jngoò sìndo ko ichán ñijòn xkó tsja tjín-la xi chiba-la xita xi tísíkkeén jè àkjale, [jè xi ichán nanga tjín-ne].

¹⁸ Jè chrjó ndajo xi tjindiì-la naxandá, koií

tjindaà-ne ndajo chjí xi 'mì jaspe. Kò jè naxandá, nguì oro sobà-né. K'oaá s'ín ote kji koni chítsín tsjeè. ¹⁹ Jñà tàts'en chrjó xi tjindaà-ne nga tíchjoàndi-là naxandá, nguì ndajo chjí yijàjno xi 'ñó ndaà kjoàn. Jè xi ítjòn, jè ndajo xi 'mì jaspe; xi ma-ne jò, ndajo xi 'mì zafiro; xi ma-ne jàn, ndajo xi 'mì ágata; xi ma-ne ñijòn, ndajo xi 'mì esmeralda; ²⁰ xi ma-ne 'òn, ndajo xi 'mì ónice; xi ma-ne joòn, ndajo xi 'mì cornalina; xi ma-ne itoò, ndajo xi 'mì crisólito; xi ma-ne jìin, ndajo xi 'mì berilo; xi ma-ne ñijaàn, ndajo xi 'mì topacio; xi ma-ne te, ndajo xi 'mì crisoprasa; xi ma-ne tejngoò, ndajo xi 'mì jacinto; xi ma-ne tejò, ndajo xi 'mì amatista. ²¹ Jñà xotjoa xi tejò ma-ne, tejò ndajo perla tjindaà-ne. Nga jngoò ìjngoò xotjoa jngoò perla tjindaà-ne. Ndiyá teè-là naxandá, nguì oro sobà-né koni chítsín xi ma chítsejèn-ya.

²² Ya jjiin naxandá, nijngoò ingo kijtseè; nga jè sobà xi ma ingo-là naxandá, jè Nainá xi tjna ítjòn nga ta jè tajngoò-né xi 'ñó tse nga'ñó tjín-là kò jè Orrè. ²³ Jè naxandá, mìkì mochjeén-là jè ts'oi kò sá nga sìhiseèn-là. Nga jè sobà kjoa isén-là Nainá síhiseèn-là; kò jè Orrè ma ni'ín-là. ²⁴ Ngats'ì jñà xitá naxandá ts'e isò'nde kinchima iseèn-né it'aà ts'e ni'ín-là. Kò jñà xitaxá ítjòn xi tjín isò'nde, kjiko kjoanchiná-là nga ya sìngatsja. ²⁵ Jñà xotjoa-là naxandá, mìkì sìchjoàjto nga kjit'aà nachrjein; nga ya naxandá, mìkì kojñò. ²⁶ Ngats'ì naxandá kjoiko ngats'ì kjoa nchiná-là kò ngats'ì tsojmì xi 'ñó chjí-là nga ya sìngatsja. ²⁷ Ya i'nde jè nimé kjoahas'en xi tjé kjoàn xi ch'o s'ín kò xi kjoa ndiso. Tà jñà kjoahas'en xi tjít'aà 'ín-là jè xojon-là Orrè xi

ts'e kjoabinachon.

22

¹ Jè àkjale tsakó jngò-na xajngá nandá xi kijna tsjeè tsjeè, jè nandá xi bítsajnakon-ná nita mé nachrjein-ne. K'oas'ín tsjeè kji koni chitsín. Yaá títbitjo ñánda síjna íxile-la Nainá nga tíhotíxoma kò yaá títbitjo ñánda tíjna jè Orrè. ² Ya jngò osen ndiyá-la naxandá tífa nandá. Kò ya ngobà ngobà xajngá nandá, yaá síjna jè yá xi tsjá kjoabinachon nita mé nachrjein-ne. Tejò k'a ojà-la toò nga jngò nó. Jngò jngò k'a ojà-la toò nga ìjngò ìjngò sá. Jñà xka-la, k'oaá s'ín mochjeén nga maxkii-la naxandá ts'e isò'nde. ³ Mì tì mé kjoa ch'o s'e-ne xi mìkii sasén-la Nainá. Yaá sasíjna jè íxile-la Nainá kò ts'e Orrè nga kotixoma. Kò ngats'ìi xita chi'nda-la, yaá sìixá-la. ⁴ Ngats'ìi xi xita-la ma, skoexkon-né kó kji isén-la Nainá; kò jè 'ín-la Nainá yaá sít'aà itjòn tjen-la. ⁵ Ya ì'nde jè, mì ti kojñò-ne. Jñà xita xi ya títsajna, mì tì ni'ín kochjeén-la xi sìhiseèn-la, tikoáá mì tì ts'oí kochjeén-la; nga jè sobá Na'èn-ná xi Nainá sìhiseèn-la. Jñà xita kotixoma nita mé nachrjein-ne.

Jyee nchrobá machraña nga kjoí ìjngò k'a Cristo

⁶ Jè àkjale kitsò-na:

—'Én koi, nguì k'oaá s'ín tjín nga kítasòn; nguì 'én kixi-né. Jè Na'èn-ná xi Nainá xi síkíchiya-la jñà xita xi chja ngajo-la, koií xá kisikasén-ne àkjale-la nga kòkò-la xi chi'nda-la ma jñà kjoa xi ta nitoón okoma.

⁷—Tiná'ya-ná. 'An, kjoí nitoón ìjngò k'a.

Mé tà ndaà-la jǎà xi síkitasòn jǎà 'én xi kitsjaà Nainá koni s'ín tíchja xojon jè.

⁸ 'An-ná xi 'mì-na Juan, 'aán ki'nchrè koa kijtseè kjoa koi. K'e nga jye ki'nchrè koa jye kijtseè, tsohósijna-xkó'nchi-niñiat'aà-la jè àkjale xi tíhokó-na kjoa koi, nga mejèn-na skoexkoán.
⁹ Tanga jè àkjale kitsò-na:

—Kì k'oaá 'nì. Jè Nainá jchaxkoín. 'An, tikoáá chí'nda-la Nainá ma, koni ngaji, ko xita xinguii xi chja ngajo-la Nainá, ko ngats'ìi xita xi síkitasòn 'én xi tíj't'aa xojon jè.

¹⁰ K'oaá tis'ín kitsò-na:

—Kì bìjna'ma jǎà 'én xi Nainá kitsjaà xi tíj't'aa xojon jè, nga jyeé nchrobá machraña nchrjein nga kítasòn. ¹¹ Jǎà xita xi mìtsà kixi títsajna nguixkon Nainá nga ch'o s'ín, ta k'oaá s'ín kàtítajna. Ko jǎà xi tíjn-la kjoakixi ko tsjeè títsajna nga nguixkon Nainá, k'oaá tis'ín kàtasíkitasòn xi kjoakixi ko kjoatsjeè.

¹² —Tíná'ya, 'an, kjoíi nitoón ìjngoò k'a. Yaá kjoikoáa chíj-la xi tsjaà-la xita koni s'ín kis'iin nga ìjngoò ìjngoò. ¹³ 'An-ná xi tíjna ítjoàn skanda tàts'en-la kjoa ko skanda fehet'aà-ne. 'An-ná xi tsibìts'iaa ko xi sikjehet'aà-na kjoa. 'An-ná xi tíjna ítjoàn ko xi fehet'aà-ne.

¹⁴ Mé ta ndaà-la jǎà xita xi [jní-la Orrè] sítsjeè-ne nikje-la mé-ne nga tjò'nde-la nga skine toò-la yá xi tsjá kjoabinachon, tikoá koma kjoahas'en xotjoa-la jè naxandá. ¹⁵ Tanga ndítsiaán kítajna, ngats'ìi jǎà xita xi ch'o s'ín, ko jǎà xi xita tj'e, ko jǎà xi kjoa chíjngui s'ín, ko jǎà xi xita sík'en, ko jǎà

xi xkósòn beèxkón kò ngats'ìì xi tsjakeè kjoa ndiso nga 'én ndiso chja.

¹⁶ —'An xi 'mì-na Jesús, 'aán kisikasén-nò àkjale-na nga tsjá-nò 'én it'aà ts'e kjoa koi, jñò xi xita naxandá-na ma. 'An-ná jè jts'én xi itjot'aà-ne tje-la xitaxá ítjòn xi ki'mì David. 'An-ná ni'ño tse xi 'ño ote kji xi bitjokàtji k'e nga tajñòya.

¹⁷ Jè Inima Tsjeè-la Nainá kò chjoón-la Orrè, tsò-né:

—Nchroboí [Na'èn Jesús].

Jñà xi nchi'nchré, k'oaá tì kàtatsò:

—Nchroboí [Na'èn Jesús].

Jñà xi xindá-la kò xi mejèn-la nandá, kàtjanchrobá, kàt'ìì kjotjò nandá xi tsjá kjoabinachon.

¹⁸ 'An, k'oaá xan-nò, ngats'ioò xi na'yà-là jñà 'én xi kitsjaà Nainá xi tjít'aà xojon jè: Tsà yá xi kjiit'aàsòn kjoa xi tjít'aà xojon jè, Nainá k'oaá tìs'ín tsjásòn-la kjo'in koni s'ín tjít'aà xojon jè. ¹⁹ Tsà yá xi kjoaáxìn jngoò-la 'én xi kitsjaà Nainá xi tjít'aà xojon jè, Nainá, tìk'oaá kjoaáxìn kjondaà xi tjí'nde-la nga skine toò-la yá xi tsjá kjoabinachon kò mìkiì tsjá'nde-la nga ya kítsajna naxandá tsjeè-la Nainá koni s'ín tjít'aà xojon jè.

²⁰ Jè xi bénojmí kjoa koi, k'oaá tsò:

—Jon, kjoii nitoón ìjngoò k'a.

K'oaá s'ín kàtama. ¡Nchroboí Na'èn Jesús!

²¹ Kjondaà-la Na'èn-ná Jesucristo kàtijnako-nó ngats'ioò. K'oaá s'ín kàtama.

'Én-lá Nainá xi kjoa ts'e Jesucristo
New Testament in Mazatec, San Jerónimo Tecóatl
Mazateco de S Jeronimo Tecoatl; maa
(MX:maa:Mazatec, San Jerónimo Tecóatl)

copyright © 2013 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9f778253-d34e-5037-af35-7bca16479aa0